



SÍLSÍLÛVÂR KYAH KYAH VANÛ

(Devanagari-Kashmiri)



M.K.Raina

Dedicated To My Parents

Stories from सिलसिलुवार 'क्याह क्याह वनु :

- १) व्यलार्थती गॅर
- २) खज़ानु
- ३) स्वर्ग तु नरुक
- ४) जुप्त तु ताक
- ५) पास तु फेल
- ६) डुडु
- ७) सुह शिकार
- ८) नबु लालु

व्यलायती गॅर

रॉत्य रातस आयि नु मे नैदर्य। न्यसुब रॉच्य गोस बु बेयि थोद वॅथिथ तु अनिगटि मंजुय दिच मे गरि कुन नज़र। यि गॅर ऑस पंचाह वॅरी प्रॉन्य। अम्युक डाइल ओस मॉलु तमुन्य रंगु तु अनिगटि मंज अथ वख्त वुछुन ओस नु सॅहॅल कथाह कॅह। मगर बु ति ओसुस शदाद। मे ओस गरि हुंद नब्ज ग्वडय थोवमुत रॅटिथ। रटुहॉ ना? ऑखुर मे ति ह्य अथ नवि सरु वख्त वुछान वारु कारु त्रे वॅरी गॅयि। मे आसु अनि गटि मंज ति अमिचि सुचनु साफ यिवान बोज़नु।

वुनि ऑस रॉच हुंज अकॉय बजेमचु तु पांछ बजुनस ओस वुनि स्यठाह वख। मगर मे ऑस नैदर रॉवमुच। दिल बॅहलॉयी करनु खॉतरु सन्योस बु अथ गरि। यि ऑस म्यॉन्य बुड्य बबन अमृतसरु प्यठु पंचाह वॅरी ब्रॉठ अॅनिमुच। गॅर ऑस जान शक्लि। अथ ऑस्य त्रे कवर प्यठु तु अलारम ऑस त्यूत बडि दिवान ज़ि पूर मॅहलु गछिहे हुशार। म्यॉनिस मॉल्य सुंदि वननु मुताबिक ऑस यि गॅर ग्वडु प्यठय बराबर रेडियो हिसाबु वख्त दिवान, मजाल छा ज़ि अख मिनट गछिहे पथ या ब्रॉठ!

मगर त्रे वॅरी ब्रॉठ आव अथ गरि रछाह किशु। यि पेयि ताकचु प्यठु वॅसिथ तु गॅयि बंद। कुंजु कॅर्य कॅर्य ति चलेयि नु कॅह। असि ओस मॅहलस मंजुय अख जान गॅडी साज़। तॅम्य कॅर अथ अँदरु नेबरु नज़राह, तु कलु गिलुनॉविथ वोनुन, “यि नबा गछि नु ठीख कॅह। अमिच मिशीन छि बदलय।” मे खॅच शान। गछि ति किथु कॅन्य ठीख? यि ऑस थोडॉयी कांह ज़चि गॅर। यि ऑस असली व्यलायतुच गॅर तु यि कथ ऑस असि बुड्य बबन कसम ख्यथ वॅन्यमुच।

गॅडी साज़न योदवय गॅर ठीख हेच नु कॅरिथ मगर ओस ज़ानन वोल। तॅम्य द्युत मे बराबर नेब ज़ि अथ कुस हेकि ठीख कॅरिथ। मे ज़ोन गॅनीमथ। मे तुल पनुन यार राजु सुत्य तु वोतुस दोरान दोरान गुरगॅर्य मॅहल। अति कोडुम तस गॅडी साज़ सुंद पय। अॅमिस कॉसिब गॅडी साज़स ओस नाव व्वस्तु रज़ाकु। अॅमिस ओस नु दुकानाह वुकानाह कॅह। यि ओस गरस मंज बिहथुय गरि शेरान। कॉसिब ओस ना? अॅस्य येलि अॅम्यसुंद गरु वॉत्य तु अॅम्यसुंदिस कुठिस मंज च़ायि, असि गॅयि अॅछ बाह बाह त्रख। अति आसु ताकचुन प्यठ हतु बज़ु गरि सजॉविथ। अजि रूसी, अजि जापॉन्य तु अजि जरमॅन्य। यि कोर मे आँकर्वेनी अंदाज़। अख ज़ु बासेयम हिंदोस्तॉन्य ति। कॅह आसु चलान तु कॅह बिहिथ। असि कॅर व्वस्तस सलामाह। तॅम्य कॅर असि कुन अँडुय नज़र तु त्रोवुन कलु बेयि ब्वन कुन। दर अस्ल ओस सु अख गॅर शेरनस सुत्य आवुर। गरि वोल ति ओसुस ब्रॉह कनि बिहिथ। मे दोप, यि गव जान। व्वस्तु छु पॅज्य पॉठ्य व्वस्तु। पनुनि कामि सुत्य कॉम, न सवालुय तु न जवाबुय। गंटु खंड गॅछिथ तुल व्वस्तन कलु थोद। खॅरीदार गव ख्वश ज़ि कॉम अंदेयि। मगर व्वस्तन वोनुस, “अमु लाल, त्रे हज़ पेयी पगाह बेयि युन, तिक्याज़ि अथ रॉव राथ अख सुचन तु स्व पेयि अथु सुत्य नॅव गरुन्य।” खॅरीदारस फीर बुथिस ज़रदी। मे कुन बुथ कॅरिथ वोनुन, “वन हज़ क्या करव? यि गॅर ऑस म्यॉन्य मॉल्य वर्लड वारु वख्तु कांगो प्यठु अॅनिमुच। छे यि असली अप्रीकॅन्य माल मगर सुचन कति अनस? व्वन्य हरगाह व्वस्तु रज़ाक अथ अथु सुत्य सुचन बनावि, ति लग्या जान? कुजा अप्रीकॅन्य गॅर तु कुजा अथु सुचन?” खॅरीदारन हेच व्वस्तस गॅर वापस। बुथिस खार्यन द्रुह तु द्राव।

व्वस्तु रज़ाक आसिहे वॉसि योहय पंचाह दुवंज़ाह ह्यु। मे कुन कॅरुन दोलु नज़राह तु वोनुन, “वन तु व्वन्य क्या बनि यथ वख्तस। कति अनु बु अॅमिस अम्रीवॅकन्य सुन्न तु स्वय लागस? ग्वडु छुना लूकन प्राह गोमुत। कबॉडिस ति हरगाह फुटमुन्न गॅर ह्यन मॅल्य, दपान छि यि ऑस मे फलॉन्य ऑशुनावन व्यलायतु प्यठु या अरबु प्यठु अॅन्यमुन्न। हता यारु, येति छना अस्ल अस्ल गरि मेलान! बा ख्वदा हज़, राथुय वॉन्न मंज़ूर अहमुदस नॅव गॅर। यि छनस मामन करॉची प्यठु सूज़मुन्न। हता यारु क्याह वनय? गॅर छा किनु क्याह? टिक टिक छुस तिथु पॉठ्य गछान ज़न छि कुकिल बूल्य करान। प्यठु वनय अख सिरु कथ। मे वोनुनय मंज़ूर अहमुदुन्य मामन ज़ि करॉची हुंज़ुनय गर्यन छि अम्रीकाह वॉल्य पनुन नाव लेखान तु कुनान। हयो मंज़ूरा...” व्वस्तन लोय मंज़ूरस नाद, मगर सु आव नु कॅह। व्वस्तन वोन मे ल्वति पॉठ्य, ‘सु आसी यारन निश गोमुत नॅव गॅर हावुनि।’ मे कोर कलु सुतुय तसुंजि प्रथ कथि आंकार। मे ऑस ना पनुन्य गॅर शेरुनावुन्य! बु ओसुस दिलु मँज़ी सोंचान ज़ि खबर कुस बद-रद वनि यि म्यानि गरि। बु गोस त्रन तु त्रुवहन। बु ओसुस यी सोंचान ज़ि मे गॅयि व्वस्तु सुंज कथ कनन, ‘वलु सॉ अन, त्रे क्या छुय?’

मे कॅड खूच्य खूच्य फ्यरनु तलु गॅर न्यबर तु थॅवुमस ब्रॉटु कनि। वॉलिंजि थॅवुम थफ कॅरिथ। व्वस्तु रज़ाकन तुज यि अथस क्यथ तु वोनुन, “वुछ तु हज़, यि गॅयि असली व्यलायतुच गॅर। अथ कुस वनि न? बा-ख्वदा छुख कुस्मथ वोल। अज़ कल कति मेली युथ माल।” बु गोस व्वस्तु सुंज कथ बूजिथ ख्वश। बुथिस आम नोव रंग। मे वोनुमस, “यि हज़ पेयि ताकचु प्यठु वॅसिथ तु गॅयि बंद।” व्वस्तन थॅव गॅर पथर। बुथ गोस व्वज़ुल नार ह्यु। सु वोथ ज़न तु मे मार दिनि। दोपुन, “यिथिस मालस छा अडु कायिर्यगी करान? युथ चीज़ गछि तगुन रॅछरुन, नतु गॅयि क्वलि मंज़ दिन्य दॅरिथ।”

व्वस्तु रज़ाकन थॅव म्यॉन्य गॅर अॅकिथ कुन तु वोनुन, “चु कति छुहॅम रोज़ान।” मे वोनुस, “बु हज़ रोज़ान बाल गार्डन।” “अदु गछतु करतु पनुन्य कॉम। कॉल्यक्यथ यितु वारु कारु, गॅर आसी तयार।” मे दोपुस, “अथ कॅन्न हज़ पाँसु लगन?” व्वस्तन वुछ नु मे कुन कॅह। सु ओस ब्याख गॅर अथस मंज़ रॅटिथ खोलान। दोपुन, “पांछ र्वपयि गछन सुतुय अनुनि।” बु द्रास गरु कुन वापस मगर दिलस रूदुम फ्रठ। “युथ नु यि अमि गरि मंज़ु व्यलायॅती सामानु कडि तु दीसी सामानु नियस लॉगिथ?” मगर करु हॉ क्याह? नारस दिमहॅवु नरि। अमि दूह आयि नु मे रातस नॅदरुय।

त्रेयिमि दूह वोतुस बु दुपहरन ह्यु व्वस्तु रज़ाकस निश। सु ओस बतु ख्यवान। दोपुन, “हतु सॉ गोबराह, मुबारख छुय। चॉन्य गॅर गॅयि ठीख, मगर त्रे पेयी स्व आथवारि ताम येती थवुन्य। चु कति यिख गरि गरि योर? बु थवय तथ बराबर टेस कॅरिथ।” मे गव दिलस तसलाह। पानस कॅरिम तॉरीफ ज़ि बु कोताह गाटुल द्रास यिथिस व्वस्तस निश यिथ। सुती सूंचुम, शायद आसुनस सुन्न तु मूजूदय, नतु वनिहे ना यि? मे दिन्न ओरु योर नज़र। पनुन्य गॅर गॅयम नु कुनि नज़रि। बुथिस फ्यरुम बेयि मोतुन मगर पानस द्युतुम तसलाह। दोपुम, ‘टेस आसि ना यि बेयिस कुठिस मंज़ करान!’

आथवारि दूह वोतुस बु सुली व्वस्तु रज़ाकुन गरु। अॅमिस ओस अख ल्वकुट लॅडकु सुतुय बिहिथ। तस ऑस जान नपु नपु करवुन्य मछि गॅर लॉगिथ। मे तोर फिकरी ज़ि योहय गछि मंज़ूर अहमुद आसुन तु यि आसि अॅमिस करॉची हुंज़ुय गॅर लॉगिथ। मंज़ूर अहमुदस आसु अथस मंज़ सरतलुवि बुरबतनि जोराह यिमन सु मशिके प्यठ नचुनावान ओस।

व्वस्तु रज़ाकन वॅड म्यॉन्य गॅर अकि जोलनु मंज़ु तु थॅवन मे ब्रॉह कनि। दोपुन वुछ तु क्याह छि चॉन्य गॅर गुर्य सुंद्य पॉठ्य रॅथ्य पकान। मे वॅर गरि नज़राह। अथ ओस डाइल तमुन्य लद। म्यानि गरि ओस सफेद डाइल। मे वोनस, “त्रे हज़ छय क्याहताम गलती। यि छनु म्यॉन्य गॅर। तथ ओस सफेद डाइल।” व्वस्तन त्रोव व्वश। दोपुन, “अहनू यारु, पज़र हय छु। यि मंज़ूर सॉब छुना मे खानु मोल। यि छुय मे दोयिमि ज़नानि दशि गँड्य गँड्य ज़ामुत। अँमी क्या साँ तुल राथ चानि गरि हुंद डाइल तु नियन तथ टिकु वावुज बनॉविथ। वन तु क्याह वनस? तोति कोर ख्वदा सॉबन रुत ज़ि अमी साइज़ुक द्राव अँकिस प्रानि गरि डाइल तु लोगुमस। नतु गॅयेयि गॅर ख्वठ ज़द।” मे तुज, यि दँप्यिज़ ति, वदान वदान गॅर अथस क्यथ। डाइल ओस कृहुन स्याख हू ति तु आवस्योमुत ति। व्वस्तन त्रॉव मे डाइलु म्वखु अख र्वपय तु चोर र्वपयि हेचुनम। युथुय मे सलाम वॅरिथ वापस नेरुन ह्योत, व्वस्तन कोर मे आलव। दोपुन यि निसॉ गोबुरा पनुन अमानथ सुत्य। मे आव नु कॅह समुज। “कुस अमानथ?” मे जवाब दिनु ब्रॉतुय तुज व्वस्तन कुनी चपाथ तु त्रॉवन मंज़ूरस। तँम्य लोग वदुन। व्वस्तन दोपुस, “यि छा गिंदन तमाशु? शिकस लद, मोल लवी युतुय।” अमि पतु नियन तस अथु मंज़ु तिमु सरतलुवि बुरबतनि ज़ु तु पिलुनाव्यन मे कुन। दोपुनम, “वुछू बबा, ख्वदा गवाह। बु छुसय नु काँसि हुंद चीज़ रटान। मे यैलि गॅर तानु तानु करनु पतु जोडुन्य हेच, यिमु ज़ु गिरारि तोरुम नु कॅह फिकरी ज़ि यिमु कत्यथ आसु अथ लॉगिथ? लेहज़ा, यि छु चोन अमानथ तु नितु सुत्य। हरगाह कुनि सातु गॅर बंद गछी, मे निशि अँन्यज़ि वापस, मगर यिमु गिरारि ति अँनिज़्यस सुत्य। खबर छा, तमि वख्तु मा यियि समुज कॅह। मगर अख कथ वनय, गॅर छय पँज्य पॉठ्य व्यलार्यँती। तान वॅडिथ ति छय यि बराबर पकान। यि कति बनी अज़?”

बु द्रास दिल मोलूल गॅछिथ। गिरारि ज़ु थव्यम चूरि युथ नु गरि कांह वुछि। मगर व्वस्तु रज़ाकुन अथु! त्रे वॅरी गॅछिथ ति आँस गॅर बे-वाय पॉठ्य चलान तु बाबर वख्त दिवान।

अकि लटि दिन्न मे बेयि गरि कुन नज़र। सुबहुचि त्रे आसु बजेमद्यु। मे ओस पांयि बजि नैदरि व्वथुन। मे वॅर बेयि श्वंगनुच कूशिश तु वुछान वुछान पेयम नैदर।



खज़ान

अकि लटि आव मे बेयि तस फँकीर सुंद बुथ अँछन तल। खोफनाख शक्ल, थोद कद, बजि बजि अँछ, कनन कनु वॉल्य, कलस सफेद दसतार, हँटिस स्वरफु चालि गुलोबंद तु अथस मंज़ कृहन्य तस्बीह। फँकीर ओसा पँज्य पॉठ्य फँकीरुय किनु सांगल, मे आव नु कँह समुज। मे गँयि सॉरिसुय पानस ज़न दुनन। तसुंज गोब तु खोफनाख आवाज़ गँयि मे बेयि अकि लटि कनन, “वख छुय नु ज़्यादु कँह। यि मे वोनुय, ति कर। बस दून दूहन अंदर गछ्ख खज़ानु हॉसिल करुन। बाकय छय त्रे सॉरुय खबर।”

मे दिन्न ओरु योर नज़र। न ओस बुथि कांह तु न पतु। यि ऑस सिरिफ तस फँकीरु सुंज छाय, खसु मे पँतिम्यव चोरव दूहव प्यठ पानस ब्रॉह कनि ऑस बासान। मे कोर दिल दौर। तसुंजि कथि हेचुम वारु साम। ऑखुर बु क्याज़ि छुस यूत बांबुर्योमुत ? तँम्य बिचारन क्याह वोन ? तँम्य यि वोन, ति वोनुन सिरिफ मे मदथ करनु बापथ। मे ह्यँच तसुंजि कथि वारु साम। चोर दूह गँयि, येलि सु मे आवरेनि नेब्रु कनि समुख तु वोनुनम, “ज़िंदगी छय स्यठाह ज़ीठ मगर कार छुय सोरुय पथर। क्याह क्याह करख तु कोत कोत वातख ? हरगाह मानख, अख खॉर गछ्थ कँरिथ। शन दूहन अंदर अंदर छुय संगरमालु फवलनु वख्तु पखलन बालु थँगिस प्यठ वातुन। अति छुय सारिवुय खोतु बँडिस बुरज़ु कुलिस तलु कनि अख खज़ानु दफन। खज़ानस प्यठ कनि छु अख शाहमार बिहिथ मगर त्रु वुछिथुय त्रलि सु। बस त्रे छुय खज़ानस नख द्युन तु मे निशि वातुनावुन। न्यसुब म्योन तु न्यसुब चोन। बु छुसय हुथ क्वलि अपारि कनि रोज़ान। मगर कुनुय ज़ोन गँछिज्यनु कँह। कॉम छे स्यठाह मुशिकल। ब्याख नफर तुलिज्यन सुत्य। खज़ानु छु स्यठाह बोड। त्रे पेयी नु कांह फख़। सथ पीरि ख्यनय आरामु सान, पतु छय पनुन्य मरज़ी। मगर अख कथ थव याद। हरगाह शन दूहन अंदर अंदर कॉम सपदि तु जान, नतु करन बु बदल असॉम्य तयार।”

खज़ानुक नाव बूज़िथ गोस बु ख्वश मगर खतरु बास्योम स्यठाह। मे ऑस करज़ु बलायाह अख कलस। बासान ओसुम वुमुर सोर्यम यि करज़ु नखु वालान। बु कर करु खांदर तु कर बसावु पनुन गरु ? खदवय फँकीरु सुंद बुथ अँछन ब्रॉह कनि यिथुय ओस मे हेरिम शाह ह्योर तु बँनिम शाह ब्वन गछान, मगर खज़ानु याद कँरिथुय ओस मे म्वर्दु अँछन ज़न गाश यिवान। मे कोर फॉसलु ज़ि अज़ राथ क्युतुय नेरु बु खज़ानु हॉसिल करनु बापथ।

मँज़िलु ओस स्यठाह बोड। मे तुजि च्वचि दँह मरु लॉचि गंड कँरिथ सुत्य तु गाश फवलवुनुय द्रास। ब्याख नफर सुत्य तुलनुक ओस नु सवालुय। हरगाह मुसीबथुय तुलुन छु, तु कुनुय ज़ोन क्याज़ि नु ? मे क्या ह्यमथ छे ना ? ब्याख कथ छुम हरफस गवाह तु मैडिस शँरीक बनावुन ?

बु गोस पकान। बाल, जंगल, क्वलु, खाह पथ कुन त्रावान वोतुस बु दुपहरस बॉग्य कॉली मातायि हँदिस मंदरस निशि। अति वुछुम स्यठाह बीरु। मे दोप लूख आसन आरती करनि आमुत्य। ब्रॉठ कुन वोतुस तु आरती वारती गँयम नु कुनि नज़रि। लूख ऑस्य लॉन कँरिथ अख अँकिस दकु दिवान तु ब्रॉठ पकान। अख नवजवान ओस लॉनि स्योद करान तु कॉसि कॉसि लॉनि मंज़ बराबर न रोज़नस प्यठ टास ति लायान। मे प्रुछ तस नवजवानस, “हे येति क्या दँलील ?” तँम्य वोनुम असुनाह त्रॉविथ, “बासान छु, नोवुय नोवुय छुख योर आमुत। त्रे छय ना किहिन्य खबर ?” मे कँर कलस ज़ीर तु तँम्य वोन, ‘स्वरगु प्यठ छु दर्मराज़न पनुन दुथ सूज़मुत तु सु छु स्वरगु लूकचि टिकटु बॉगरान। यस यस

मरनु पतु स्वरगस गछनुक शोख आसि, सु हेकि येती पनुन्य टिकठ ह्यथ।' टिकठ ऑस हथ र्वपयि, मगर मे आसु चंदस वुहय। मे कति ऑस खबर जि स्वरगुचि टिकटु मेलन ज़मीनि प्यठुय ? मे दोप जान गव मे बूज दरवेशु संज कथ तु यपॉर्य द्रास। यि कॉम ति थवव यपॉरी कॅरिथ। अदु पाँसु जन छिनु बराबर चंदस, वज्रमिस पन्न न ? अँस्य क्या जलुव कुन। बेयि पगहुकि प्यठु यिमव अँस्य ति वारु कारु बड्यन मोहनियन मंज गँजरावन। खजानु आसि ना गरु वोतमुत!

मे बोज़नोव नव जवान बडु आरु हति बुथि पनुनि चंदुच दॅलील। तँम्य द्युतुम दिलासु। दोपुन अदु कॅह परवाय छुनु, बु करय सुफॉरिश। तसुंदिस दिलासस प्यठु रूदुस बु लॉनि। बुथिस खोतुम त्युथ रंग जन तु मे वरॉय कहुन्य गछिहे नु जनतस। युथ नु नव जवान पोतुस कॅह दगा गछि कॅरिथ, मे लॉज तस सुत्य यारज। तस निशि नन्यव मे जि टिकटु कुनुनुक कम्प रोजि पांचन दहन जॉरी। यि नवजवान ओस कमि ताम बेयि शहरुक तु यि ओस दर्म राजुन्य दूतन पानस सुती ओनमुत। नव जवानस सुत्य कथ करनस लोग मे स्यठाह मजु मगर यि मजु रूद नु जादु कालस बरकरार। युथुय तँम्य मे प्रुछ जि टिकठ ह्यथ कोत छुय गछुन, मे फॅट्य ऑरख। जंगन चायम थरु थरु। दोपुम हय हे! अँमिस गोछ नु शख आसुन गोमुत। नतु क्वसु चेट्य अँमिस जि मे कोत छु गछुन। मे द्युत नु तस जवाबाह कॅह, मगर तँम्य पृछुम बेयि, “क्या साँ, कमन ग्वतुन गोख ? वनानुय छुख नु कॅह। अँस्य क्या सुत्य यिमोयि ?” मे दोपुस, “हा न साँ तिछ कथ छनु। दफ बु ओसुस सॉचान जि टिकटि हुंज बाक्य पाँसु कति अनु ?” अमि पतु कॅर नव जवानन छ्वपय तु मे ति ह्योत तस निशि वारु वारु लोब।

बु रूदुस लॉनि मंज ब्रॉह पकान। बुथि ओस अख स्टेज बॅनिथ, यथ प्यठु अख बुजर्ग बिहिथ ओस। तस सुती ओस ब्याख अख नवजवान बिहिथ, युस लूकन निशि पाँसु ओस रटान। बुजर्ग ओस पानय टिकटु बॉगरान। म्यॉन्य वॉर्य वॉन्न तु मे त्रावि वुह र्वपयि नवजवानस ब्रॉठु कनि। तँम्य कॅर मे दोल नजर। मे दोपुस, “बाया, अज छुय मे युतुय चंदस। हरगाह पन्नख, पगाह दिमय बाक्य। अखुन्य दिमय पाँछ अलाव।” मगर नवजवानस गव नु असर कॅह। तँम्य कोर साफ इनकार। बुजर्ग ओस नु ऑसु सुत्य कांह कथ करान। सिरिफ ओस इशारु हावान। तँम्य कोर नवजवानस पाँसु रटनस मनाह। मगर बु कथ मानुहँस ? मे लोगुस रडु। मे पथ यिम लॉनि अँस्य तिमव लोग शोर। बु ओसुस नु कुनि सूरतस मंज टिकटि वरॉय नेरनस तयार। म्वखसर चायि लॉनि मंजुक्य जु त्रे नफर मंजु तु कोरुख फॉसलु। वुह र्वपयि दिथ ह्यकु बु सिरिफ टिकटि हुंज बुकिंग कॅरिथ, तु टिकठ मेलि तेलि येलि बु बाक्य शीथ र्वपयि दिमु। मे ज़ोन गॅनीमथ। अज करव बुकिंग, पगाह येलि बु खजानु वापस ह्यथ यिमु, तेलि दिमोख बाक्य र्वपयि तु ह्यमोख टिकठ। दर्मराजुन्य दूतन मॉन्य यि कथ। कलु सुत्य कोरुन आंकार। मे पिलुनोवुन टिकटि बदलु अख काकुद यथ प्यठु वुहन हुंद रॅसीद तु टिकटि हुंज बुकिंग दर्ज ऑस कॅरिथ। मे थोव काकुद चंदस मंज तु द्रास।

वति पकान पकान आव मे खयाल। मे दोप यिनु यिम मे पगाह फंद करन तु टिकठ दिनस करनम इनकार! या अँस्यतन यिम म्यानि वापस फेरनु विजि डूंगु बडॉविथ चॅल्यमुत्य! मे चायि फिकिर। हरगाह गरु फेरु वापस बाक्य र्वपयि अननु बापथ, यपॉर्य गछ्यम खजानस प्यठु वातुनस चेर। मे द्युत पानस दिलासु, ‘करन क्याह ? लूठ छा ? बुकिंग छना कॅरमुन्न ? फंद फिरेबी करन तु अदालथ वान छा दॅद्यमुत्य ? अकि अकि ह्यमख हिसाब।’

पखलन बालस निश वोतुस बु सिरिं लूसिथ। अनि गटि मंज पहाडस खसुन ओस खतरनाख। मगर रोज़ कति रातस? अथ जायि ओस जंगली जानवरन हुंद खतर ति स्यठाह। मे पेयि अँकिस यायि कुलिस कुन नज़र। कुल ओस बोड तु अँकिस लंजि प्यठ ऑसुस बेहनस ति जान जाय। मे दोप रातस गव अँती गुज़ार करुन। बु खोतुस पँज्य संद्य पॉठ्य कुलिस। लंजि प्यठ बनॉवम बेहनस किन्न जाय। च्वचि दँज मुचरॉवम तु बँरुम यड। अमि पतु त्रॉवम कुलिस प्यठय नँदर।

सुबहुचि चोर आसुहन बजेमचु येलि बु हुशार गोस। वुनि ओस न्युक न्युक गाश ति यिनय। मे ज़ोन नु वख्त ज़ायि करुन मुनॉसिब। बु वोथुस कुलि प्यठ ब्वन। लोरि हना अख तुजिम अथस क्यथ तु ह्योतुम पहाडस खसुन। योदवय अनि गटि मंज साफ साफ ओस नु यिवान बोज़नु, मगर बु ओसुस आँकवँनी वथ छांडान तु ड्वचुर ड्वचुर दिवान। बुथि आँस्य कँड्य दार ज़ंड। ख्वरन तु जंगन वोथ कँड्यव सुत्य मुसलु, मगर मे हॉर नु ह्यमथ कँह। बु रुदुस ह्योर कुन लमान। खज़ानुक चेशकु ओसुय दिलस, सुती दिन्न स्वरगुचि बुकिंगि ति स्यठाह ह्यमथ। दून च्वन जायन गोस बु डुलु ति, मगर मे कोर दर्यर। मे ओस नज़रि तल सिरिफ पखलन बालु थोंग तु खज़ानु। वातान वातान वोतुस बु वारु कारु बालु थोंगिस प्यठ मगर पान ओसुम अडु मोर गोमुत। वुनि आसु संगरमालु फवलनय। मे त्रौव अँकिस पॉतरि कनि प्यठ डाफ।

म्यानि हिसाबु आसिहे मे ओड गंटाह गोमुत डाफ त्रॉव्यमुतिस ज़ि मे गँयि कनन क्रख। ज़न ओस सुह कति ताम ग्रज़ान। मे गँयि वॉलिंज न्यबर नीरिथ। योत ताम वाचोस वारु कारु, व्वन्य गोछुम नु पोतुस सुह ख्योन! मे दिन्न ओरु योर नज़र। कुलाह कोटाह ओस नु कांह। दूरि अँकिस जायि गव मे होखमुत बुरज़ कुल अख नज़रि। मे त्रॉव दव तु खोतुस अँथ्य कुलिस प्यठ। सुह गोम नु कुनि नज़रि। खबर यि मा आसिहे मे वँहमु! रछाह गँछिथ वोथुस बु कुलि प्यठ ब्वन। संगर मालु आसु तयार फवलनस। मे लोग बोड बुरज़ कुल छांडुन। दूर दूर ताम गोम नु कांह कुल नज़रि। मे दिन्न वारु व्वन्य तँथ्य कुलिस नज़र, यथ बु सुह सुंदि खोफु खोतमुत ओसुस। अति न ओस शाहमार तु न बास्योम खज़ानु। सूंचुम, खबर शाहमार मा आसि मे वुछान वुछानुय च़ोलमुत। खज़ानु ह्य आसि तु येथ्य कुलिस तल गछि आसुन।

मे ह्योत पॉतरि टुकरव सुत्य ज़मीनि खनुन। अथन खँतिम हठ। यीतिस कालस फोल पूर गाश तु सिरिं ह्योतुन नोन नेरुन। फुटु जोराह खँनिथ ति आव नु मे कुनि खज़ानु बोज़नु मगर मे हॉर नु ह्यमथ। सूंचुम कँह वख्त तकलीफ तुलिथ छि वुमरि आँश करुन्य। बु रुदुस खनान। द्वयव पतु त्रे तु त्रेयव पतु च़ोर फुट। मगर खज़ानु नदारद।

व्वन्य लँज मे त्रेश। बु दोर्योस पोन्थ छांडनि हुपॉर्य तु यपॉर्य मगर पोन्थ गोम नु कुनि नज़रि। अँकिस जायि वुछिम सासु बँद्य केम्य क्रूल अँकिस कँड्य ज़ंडस तल बिहिथ। ज़ंडस तलु कनिच ज़ेमीन आँस अँदर। मे आोन अख पनु वँथरु तु यि लोगुम अथ जायि मेचि मंज तिथु पॉठ्य ज़ि अथ रुज़ तोंथ ब्वन कुन अलूंद। वारु वारु हेतिन अमि पनु वँथरु प्यठ पां फेर्य पशुपुन्य। मे थोव ब्याख अख पनु वँथरु कचुल ह्यु बनॉविथ अथ तलु कनि, युथ ज़न पोन्थ अथ मंज जमाह गछि। यि ओस बडु ज़्यूठ कार। पां कचुलस लगुहँन यिथु पॉठ्य गंटु वादु बँरिथ यिनस। मगर अमि सुत्य रुज़ मे व्वमेद बरकरार।

पनु वँथरुकिस कचुलस मंज येलि पां फेर्य दँह वुह जमाह गँयि, मे त्रॉव्य तिम ज़ेवि प्यठ। सॉरिसुय पानस पेयम शैहलथ। कचुल थोवुम बेयि जायि प्यठ लॉगिथ। सिरिं ओस व्वन्य स्यठाह ह्योर वोतमुत। मे

तुज दोर युथ ज़न खज़ानु वदि कडनु बापथ बेयि फुट ज़ु फुट खँनिथ ह्यक। युथुय बु खज़ानु ख्वडस निश वोतुस, मे च़ेज ख्वरव तलु मेच़ नीरिथ। ख्वडस मंज ओस बोड कृहुन शाहमार ऑर कॅरिथ बिहिथ। मे कॅर ह्यमथ। पॅकीरु संज कथ हेच़ुन पॅज नेरुन्य। शाहमार आव अथि, वारु कारु मेलि खज़ानु ति। पॅकीरन ओस वोनमुत जि मे कुन वुछिथुय च़लि शाहमार। सु च़ोल नु कॅह। मे सूच खबर अँमिस मा पेयि नु वारु मे प्यठ नज़र। मे कोर तस हिश...श..श... तु दिच़ुमस ख्वरु सूत्य ज़ीर। शाहमारन दिच़ कुनी ग्राय पानस तु याशाह कॅरिथ दिच़ुन मे ख्वरस ट्वफ। बु प्योस अँती पथर। अँछन गोम अनि गोट तु अँछ लजम बुरज़ कुलिस कुन दरस। शायद गोस बु मॅरिथ।



स्वर्ग तु नरुक

म्याँनिस अमानथ दिनस सुती गँयि हट्ट कट्ट जवान जोराह मे ब्रॉह कनि पॉदु। यिम आसुहँन नवि ज़मानुक्य यमदुथ। बुथ ओसुख प्रोन तु ह्यंग ति ऑसिख नु केंह। अँकिस ओस क्लीन शेव तु बेय ओस फ्रेंच कट थोवमुत।

बु ओसुस वुनि युहँद कद तु बाडवय सरु करान जि यिमव वँर मे नर्यन दून थफ तु तुलुहँस थोद। अमि पतु तुल यिमव आकाशस कुन कदम। बु गोस हॉरान तु परेशान। मे ओस नु ज़ांह ज़मीनि प्यठ स्योद पकुन तगान मगर यिमन सुत्य सुत्य ह्योतुनस बु ति हवहस मंज़ वुडव वँरिथ पकुन। योदवय म्यानि नरि ज़ंगु आसु नु हिलान केंह, मगर बु ओसुस रज़ि रोस्तुय ज़न हवॉयी फोजुकिस जंगी जहाज़ुक्य पॉठ्य पकान। मे ज़ोन जि मे छु ज़िंदुगी निशि अथु छोलमुत, मगर दिलुक तमाह, सु ओसुम ज़न वुनि ति कलु कँडिथ। मे दिन्न ब्वन कुन वारु नज़र। शाहमार ओस ख्वडस मंज़ वुनि ति ऑर वँरिथ बिहिथ। शायद ओस तस वुनि ति यि फ्रठ जि बु मा यिमु वापस तु खज़ानस करु कबज़ु।

दुनियिहा अख कँडिथ वॉत्य अँस्य कथ ताम जायि। मगर मॉफी दिज़्योम! येति कति ओस दुनियाह ? सु ओस ना मे मँरिथ पथ कुन त्रोवमुत। आ, दँपिव असमाना अख कँडिथ वातनोवहस बु यम दूतव अँकिस जायि। क्लीन शेव यम दूतन कोड पतलोनु चंदु मंज़ु अख चीज़ तु रोदुन ऑसस ब्रॉटु कनि। यि चीज़ ओस त्युथुय युथ सॉनिस दुनियिहस मंज़ टेलेफोन आसान ओस। रंग डंग ओसुस जान। शायद आसिहे यि ति टेलेफोनय, मगर तार ऑसुस नु केंह। असि ओस बूजमुत जि व्यलायतस मंज़ छि तारि वरॉयी टेलेफोन आसान। शायद मा आसिहे अँम्य जवानन ति तती प्यठ अनुनोवमुत। खॉर मे क्या अथ सनुन ? मे ओस ज़मीनि प्यठ पनुनिस गरस मंज़ फोन लागनुक अरमानुय रूदमुत। म्याँन्य मॉल्य ओस टेलेफोन महकमस मंज़ दँह वँरी ब्रॉट पांछ हथ र्वपयि बँरिथ फोन बुक कोरमुत। मगर सु कति फोन ? येति बु अफसरन पृछनि गोस, दोपुहम, “हता यारु चु मा छुख पागल गोमुत! येति छि वुह वँरी ब्रूटिम ‘ओन योवर टेलेफोन’ वॉल्य ज़ु ज़ु सास बँरिथ ति यपारी। चु कथ छाँडान पांचन हतन प्यठ फोन ?” मे फोर्यव नु जवाबय। व्वन्य करेयि फँकीरन मे यॉरी तु मे सॉचोव जि बु ह्यमु ततकाल सकीमि मंज़ुय व्वन्य द्रोगि म्वलु फोन, मगर ज़िंदुगी द्युत नु साथ केंह। हरगाह मे क्वदरथ खज़ानु लँबिथ निनुक वख दियिहे, द्यव बु ति पनुनि दारि प्यठ बिहिथ तु फोन अथस मंज़ रँटिथ मखन लालस आलव लायिहॉ, युथ तस हेरिम शाह ह्योर तु बँनिम शाह ब्वन गछिहे! मगर सु कति। चकि बु शिकस लद। वनु कस ?

मे त्रोव ज़्यूठ वश तु त्रॉवुम बेयि यम दूतु सुंदिस तारि रोस्तुय फोनस कुन नज़र। सु ओस कस ताम सुत्य कथ करान। मंज़ु मंज़ु मे कुन नज़राह त्रॉविथ कलु हिलावान तु मंज़ु असन खंगालु त्रावान। ब्याख यम दुथ ओस वुनि ति मे अथस थफ वँरिथ।

केंह काल गँछिथुय त्रोव यम दूतन फोन चंदस तु पृछुन मे नाव। मे वोनस, “बाया, ज़मीनि प्यठ ऑस्य मे लूख लोलु सान वनान ‘साहब’। नतु हरगाह पज़र बोज़ख, असली नाव ओसुम कृष्णदास। कृष्ण सुंद दास कम तु पनुन ज़्यादु।” क्लीन शेव यम दूतन वँर मे बुथिस कुन नज़राह। वापस द्युतुन नु जवाबाह कांह। अँस्य रूद्य पकान, या वँन्यतव वुडान। बुथि ओस सख ओबुर। मे पैयि बदनस ठँडी। मे हेचॉयि यम दूतन सुत्य बेयि कथ करुन्य मगर तिम ऑस्य दूनुवय मनहूस बलायि। म्यानि कथि द्युत नु तिमव कन केंह। मे पैयि रुसवा गँछिथ छ्वपय करुन्य।

ओबरु मंजु येलि अँस्य न्यबर द्रायि, मे वुछ बुथि अख बोड देवारु। देवारस अँस्य ज़ु दरवाज़ु। अँकिस प्यठ कनि ओस लीखिथ स्वर्ग तु बेयिस प्यठ कनि नरुक। मे ह्यच्चॉयि बड कुदामु सान स्वर्गस कुन पँद्य त्रावन्य जि यम दूतव प्युर ज़बरदस्ती म्योन चोंठ नरकस कुन। मे मान्योव नु कुनि वति मगर चल्थोम नु केँह। मे ओस नु ज़न नर्यन ज़ंगन ताकथुय। अंदर अन्नान अन्नानुय गव मे अँछन अनि गोठ। मे यि नरकस मुतलिक बूजमुत ओस, बराबर ओस ती। जायि जायि ओस नार दज़ान तु यमु केँकर नारस ब्रोंठ कनि नन्नान तु नग्मु करान। शायद आसुहन क्वकर्मि अथ नारस मंजु दज़ान। कुनि कुनि जायि अँस्य इनसान कुल्यन अलूंद त्रॉविथ। अँकिस जायि ओस लूक अरसाथाह सँमिथ। तिमव ओस सख शोर लोगमुत। दर्म राज़ ओस पंडालस प्यठ बिहिथ तिमन सज़ाह बोज़ुनावान। बु येलि तिमन नज़दीख वोतुस, मे प्यव ज़न तु असमान कलस प्यठ। मे वुछ अति तिम तिम नफर, यिम ज़मीनि प्यठ स्यठाह दान तु प्वन्य करान अँस्य। यिमन हुंद अख दर्शुन करनु बापथ लूख सासु बोद खर्चान अँस्य तु मीलु वादु पकान अँस्य। “गव सु ओस सोरुय अपजुय!”, मे वोन पानस सुत्य। मगर म्यानि सोंचनुच आवाज़ ति अँस बडि गछान। फ्रेंच कट वॉलिस यम दूतस गँयि म्यॉन्य कथ बूजिथ कन खडा। योदवय तस फिकरी ओस नु केँह तोरमुत, मगर तोति दोपुन, “अज़ कथ छुख नारस नरि दिवान? तति क्याज़ि सूंचुथ नु?” मे दोपुस, “बाया! बु छुस नु ति सोंचान यि च्चु सोंचान छुख। बु छुस हॉरान गछान जि यिमव ज़मीनि प्यठ रुत्य कर्म कॅर्य, तिमव मंजु ति छि वारयाह मे येति नज़रि गछान।” यम दुथ ओस शायद ज़ानन वो। दोपुन, “ति छनु कथ। असली तल छि ज़मीनि हुंद लूख आसान क्याहताम, तु बासान क्याहताम।” मे म्यूल पनुनि सवालुक जवाब। पानस मुतलिक ओस नु मे शखुय कांह। बु ओसुस सिरिफ तु सिरिफ नरक खॉतरय ज़ामुत। हरगाह मे कुनि सातु कांह रुत कर्म कोरमुत ति ओस, सु ओस मे तमी सातु दुनियिहस निश कुनिथ ख्योमुत। सु ओस नु कांह त्युथ नफर युस बु ज़ानुहँन तु यस नु मे पनुनि रुचि कामि हुंज कथ कन पॉव्य पॉव्य आसिहे वॅनिमुच। मगर बु ओसुस सोंचान यिमन नफरन हुंद, यिमन ज़मीनि प्यठ स्यठाह नाव ओस तु यिम रुत्यन नफरन मंजु शुमार अँस्य सपदान। म्यान्यन नज़रन तलुय अँस्य वुन्यक्यन कम अज़ कम अख दरजन तिथ्य नफर दर्म राज़स ज़ारु पारु करनस लॅग्यमुत्य। मगर जान गव, तिमन पैयि नु मे कुन नज़र, नतु गछिहेख वारय रुसवाँयी तु मे खसुहँन बॅल्य पाफ।

म्यानि खॉतर ओस शायद क्वदरतन रुतुय सूंचमुत। मे अँस स्वरगुच बुकिग वॅरमुच तु तम्युक रँसीदु ओस मे वुनि ति चंदस मंजु। मे छुडोव पनुन अथु जवानु सुंदि अथु मंजु तु ब्यूदुस अँकिस कनि पलस प्यठ। गासु द्रमुन मा ओस अति कुनि जि तथ प्यठ बेहमहॉ! फ्रेंच कट वॉल्य त्रॉव मे कुन दोल नज़राह, तु पृछुनम, “क्या साँ यिती सुत्य थोकुखु? वुनि छनु कथुय।” मे वोनस वापस, “न साँ, स्व दॅलील छनु केँह। असली कथ छे यि जि मे छि स्वरगुच बुकिग ज़मीनि प्यठय वॅरमुच। पछ नय बिही, रसीदु हावय।” यम दूतस बीठ नु पछुय। दोपुन, “हे यारु, च्चे हिविस शिकस लदस कपर्थ गँयि स्वरगुच बुकिग? स्वरगुचि टिकटु छा आसान वति पेमचु जि च्चे तुजुथ अख पानस किच। तलु बा हाव?”

मे कोड चंदु मंजु काकुद तु होवुमस। काकुदस ओस टाकारु पॉठ्य दर्म राज़ सुंदिस दुथु सुंद दसखत। जवानस फीर बुथिस लेदरि छठ। काकुद होवुन पनुनिस साँथियस। तमि पतु वॅरुख क्याहताम कथ पानुवॅन्य कथ ताम बदलुय बोलि मंजु। शायद आसिहे यि संस्कृत। मे आव नु केँह समुज। असि कर ओस संस्कृत पोरमुत? भगवत गीतायि हुंद ति अँस्य असि ग्वडनिक्य पांच या सथ श्लूक तगान

परुन्य, तिक्याजि तिम ऑस्य ज़बॉनी याद। नतु कति अँस्य तु कति संस्कृत! मोल मॉज ति ऑस्य दिवान अंग्रीज्य परनसय प्यठ ज़ोर। दपान ऑस्य पतु कथ लगिवु संस्कृत ?

बु रूदुस कटु चेश्मव तिमन दूनवन्य यम दूतन कुन वुछान। फोनु वॉल्य यम दूतन वॉर मे नरि थफ तु दोपुनम, “हे बाया! सॉन्य छय नु कांह गलती। असि यि वोनुख, ती कोर। व्वलु हुमिस दर्म राजस हावव यि काकुद तु पृछोस जि व्वन्य क्या छु करुन?” मे रोट दरकु। दोपुमस, “बस, येमि अलावु पकय नु बु अख कदम ति। त्वहि छुवु गछुन तु गँछिव। बु प्रारोवु येती।” तिमव द्युत मे इजाजथ पथर बेहनस तु पानु गँयि दर्म राजस निश। बु रूदुस यीतिस कालस ओरु योर वुछान। यि अंघ पँख्य सपदान ओस, ति वुछनु सुती ओस दहशथ गछान। मे वोन कृष्णु बगवानस कुन, “व्वन्य रँछिज्यम येति योर। ऑखुर युथ छुस तु त्युथ, मगर म्यॉनिस नावस सुत्य छुना चोन नाव ति! हरगाह मे कँह वुल्टु गछि, तमि सुत्य गछी ना त्रे ति बदनामी। लूक वनन ना कृष्णु बोरुख नरकस।”

शायद बूज म्यॉन्य व्वनथ कृष्णु बगवानन। दूनवय यम दुथ आयि असवनि बुथि वापस तु दोपुहम, “हे बाया! न्यसुब मुश्किल गोय हल। मगर त्रे छय शीथ र्वपयि वुनि बकायाह। तिम कति अनख ? हरगाह शीथ र्वपयि अँज्य बरख तु अँज्य निमोथ स्वरगस। नतु छुय येती ब्युहुन।” मे ओस नु चंदस पाँसाह कांह। मे दोप तिमन आरु हति बुथि, “बलायि लगेवु, दियिव ना तामथ व्वजुम। बु दिमोवु पतु वापस। स्वरगस मंज आसि मे कांह नतु कांह पनुन पाँसु वोल!” तिम वँथ्य दर जवाब, “असि कति गँयि हारु पाँद ? येति छा काँसि तनखाह मेलान वख्तस प्यठ ? अगर बिही, त्रे र्यथ गँयि तनखाह निनुसय। त्वहि छवु पताह अँस्य छि येति ऑश करान। ज़ानि हा यारु सोन पान, किथु वँन्य छि अँस्य दूह दूह कडान।” बु गोस यि दँलील बूजिथ हॉरान। दोपुमख, “क्याजि, येति छुना बजठ वजठ किहीन्य आसान ? तिम पाँसु कोत छि गछान ?” तिमव त्रोव व्वश। दोपुख, “आसान क्याजि छुनु ? आसान छु, मगर सु सोरुय छु दिवताहन हँदिस टी.ए. तु डी.ए. हस प्यठ खर्च गछान।”

“टी.ए. तु डी.ए.!! क्युथ टी.ए. तु डी.ए. ?” बु गोस हॉरान। तिमव वोन व्यस्तॉरिथ, “तिम छिना कालु पगाह लाव लश्कर ह्यथ पृथवी लूक तु पाताल लूक गछान। तति छिनु तिम ज़्यादु दूहन ब्यहान कँह, मगर तोत ताम युस ज़्यूठ फॉसलाह छु, तिम छि तमी हिसाबु चार्ज करान। व्वन्य हय बचि तु बचि क्याह ? अँस्य ति छि छ्वपु दम वँरिथ सोरुय बरदाश करान। करव ति क्याह ? येति मा छु तुहँघ पाँठ्य हाई कोर्ट तु सुप्रीम कोर्ट ? यि दिवता पानु वनि, ति छु फाईनल तु अटल।”

यिमु दँलील बूजिथ चायि मे तुर। मे सूंच, अमि हिसाबु छु ज़मीनि प्यठ जनथ। हरगाह कांह नफर येति प्यठ हुत ताम ति क्रकु दिवान दिवान पकि, दँहन जायन पृछनस वति पकवुन्य जि बाया कुस तकलीफ छुय ? येति छु यि बदलय तावन। असि मा छु युथ कुसाह ज़ांह वुछमुत! हरगाह ज़मीनि प्यठ अँकिस दूहस ति काँसि तनखाह बंद करन, हाई कूटी ताम कर्यख लार।

मगर वुन्यक्यस ओस नु अथ मसुलस प्यठ बहस करुन मुनॉसिब। वुन्यक्यस ओस सवाल शीतन र्वपुयन हुंद। मे वोन फोनु वॉलिस यम दूतस, युस दूयव मंजु सीनियर ओस बासान, “बाया, मे मानतु च्चु पनुन त्वकुट बोय। छुना सलाह, मे निख वापस तथ बुरजु कुलिस निश। खबर शाहमार मा आसि च़ोलुमुत, बु दिमुहॉ खज़ानस थफ। हरगाह बरादँरी वँरिव, न्यसुब गव तुहँद तु न्यसुब गव म्योन। त्वहि हरगाह यि फ्रठ छु जि बु मा च़ल, हतुसाँ मे थँव्यतव ज़ंगन गंड वँरिथ।” मगर अमि सुत्य अंदेयि नु काँम कँह। तिमव वोन जि अकि लटि परलूकस मंज यिथ छुनु वापस गछनुक सवालुय व्वथान। मे

रँट्च तिमन ख्वर जि कांह सँबीला सूचतव म्यानि खॉतरु। “ऑखुर म्यानि वुह वंपयि, यिमु मे बुकिंग करनस दिचु, मा गछन बिलकुलहय फँक्य ?”

फोन वॉल्य कोर बेयिस सॉथियस सुत्य मशवरु। तमि पतु कोडुन चंदु मंजु बेयि फोन तु कॅरुन कस ताम सुत्य कथ। बुथि तलु ओस बासान जि कॉम छे अंदन वाजेन्य। केंह काल कथ करनु पतु थोव तँम्य फोन बेयि चंदस तु वोनुन, गहे अख सँबील छय। हरगाह च्ने ज़ांह कालि काँसि बेछुवनिस या काँसि फँकीरस छवपु दम कॅरिथ कांह पाँसु छुय द्युतमुत, सु यियी मुजराह।” मे प्यव याद, मे ओस तँस्य फँकीरस नपु नपु करवुन हँत्युन द्युतमुत, येम्य मे खज़ानुक पय ओस वोनमुत। तु यिहँय अख कथ ऑस नु मे काँसि वँन्यमुत्र तिक्याजि बु मा ओसुस यछान जि कांह गछि खज़ानुकिस राजस वॉकफ गछुन। मे वोनुमख, “आ, द्युतमुत क्याजि छुम नु! फलॉन्य फँकीरस मे पूर हथ वंपयि द्युतमुत। व्वन्य गव च्नु वनुहम रँसीदु हावुन, सु मा छुम!”

जवानन कॅर बेयि फोनस प्यठ कथ, तु हिलोवुन कलु। दोपुन, “कुसमतु वोल छुख। योहय अख रुत कर्म छुय नु च्ने काँसि निश वोनमुत तु अम्युक फल म्यूलुय वुन्यक्यस। व्वलु पख स्वरगु लूकस कुन।”

अँस्य हेतिन स्वर्गु लूकस कुन नेरुन्य जि पँत्य किन्य वोथ हुय। नरकु मंजु पेयि किथु ताम पॉठ्य म्यान्यन केंचन ज़ॉन्यकारन मे प्यठ नज़र। तिम आयि दोरान दोरान तु कॅरुख मे ख्वरन थफ। दोपुहम, “बलायि लगोय। अँस्य छि येति कुन्य मँशीदि हुंद्य जिन ही गॉमुत्य। कुनि छुनु दिल लगान। च्नुय योत ह्यकख असि दिलासु मदारु दिथ। मतु गछतु स्वर्गस केंह। असि सुत्य रोज़ तु येत्य। अँस्य ऑस्य ना ज़मीनि प्यठ चॉनिस प्रथ पँजिस अपजिस साथ दिवान! वुन्यक्यस कथ छुख असि वुछिथ कलु फिरान?” यिमन मंजु ओस गूकलु ति, येमिस मे जिंदु पानस हसमतुन्य वसमथ ताम खेमुत्र ऑस। सु ओस ज़्यादय पहान रज़न खसान।

मे सूच हरगाह बु यिहुंजि कथि कन थवु, बु गछु येमि मोकु निशि अथु छँलिथ। कँह्यताम कँह्यताम बनेयि मे सवर्गस गछनुच सँबील जि यिमु शिकस लद गँयि बूद। हता यारु बु क्या दारोवु केंह ? ज़मीनि हुंद हिसाब म्वकुल्योव ज़मीनि प्यठुय। गँछिवू यारु, तोह्य पानस तु बु पानस। मे वोन तिमन आरु हति बुथि, “हे यारु बु ज़ानोवुय नु तोह्य। मे कथ छिवु अनान ऑर्य कटिन्य तौर्य कँट्य वॉलिथ। गँछिव वँरिव पनुन्य कॉम।” मे कोर यम दुतन इशारु जि पँकिव जल जल स्वर्गु लूकस कुन। तिमव रँट मे नॅर तु हेचुख वुडव करुन्य। मगर च्चकि म्योन कुस्मथ खराब। युथुय बु ह्योर कुन ह्योतुनस खसुन, गूकलन कॅर मे ज़ंगि थफ तु द्युतुनम द्रसु। बु आस याशाह वँरिथ कनिविस देवारस प्यठ लायिनु तु फोटुम कलु।

अँथ्य सुत्य गोस बु नैदरि हुशार। मे वुछ पनुन्य मॉज म्यानि ज़ंगि थफ वँरिथ द्रसु दिवान तु वनान, ‘व्वथू व्वन्य। परबथ छुय ना गछुन! च्नेर गोय। यिमन यारन वोतुय ऑदि प्यठ प्रारान।’



जुप्त तु ताक

मे दिन्न अँछन मूरन। यि सोरुय ओसुस बु सोपुन वुछान। गरि कुन कँरुम नज़र। पांछ आसु बजेमच्च। दरवाज़स प्यठ आँस्य म्यॉन्य त्रे यार विजु, राजु तु निकु प्रारान। बु वोथुस थोद तु वोतुस आंगुनस मंज़। अथाह बुथाह न्यूम छँलिथ। दूबि द्राव कुरतु पाँजामु लोगुम तु द्रास यारन सुत्य परबथ कुन।

दर अस्ल ओस अमि दूह असि मैट्रिकुक रिज़ल्ट नेरन वोल। असि ओस कालय फॉसलु कोरमुत जि गाश फवलनु ब्रोंतुय गछव परबथ। अख दिमव प्रक्रम तु बेयि तुलव गँणीशु बलु निश तोमलु फँल्य। यि कुसमतस आसि, ति ननि तँती।

अँस्य रूद्य निकिस निकिस गाशस तेज़ कदमव पकान। सफा कँदल, नोव कँदल, आँल्य कँदल तु नायोट त्रॉविथ वॉत्य अँस्य गँणीशु बल। अति कोर ट्चोकाह पॉन्य पानस पानय, यि ज़ॉनिथ जि हरगाह गुरु जियस निश गछव, सु पिलुनावि रँतन दीप। असि आँस्य नु पाँसु किहीन्य तु बँल्य गछिहे दँहन थी खजालथ। गणपथ जियस कोर नमसकार, परन पेयस तु द्रायि ब्रोंह कुन। बुथि ओस सु कुल यथ तलु कनि लूख तोमुल आँस्य त्रावान जानावारन ख्यनु बापथ। यिमय तोमलु फँल्य अथस मंज़ तुलिथ आँस्य लूख पनुन कुसमत ति वुछान। खास कँरिथ आँस्य शुर्य पनुन पास या फेल वुछनु खॉतरु यिम तोमलु फँल्य तुलिथ गँज़ुरावान। ताकुल गँयोव पास तु जुप्त गँयोव फेल। यूत यूत कुल नँज़दीख ह्योतुन वातुन, मे हेचुन जंगन थरु थरु अचुन्य।

ग्वडु तुल्य निकन तोमलु फँल्य तु दितिन विजस अथि। बुथिस आँसुस लेदरि छठ फीरमुच्च। निकु ओस सोन लीडर तु प्रथ कांह कॉम आँस अँमिसुय प्यवान ग्वडु करुन्य। विजन गँज़ुरॉव्य, यिम द्रायि काह फँल्य। दोपुन बाया, निकस छिवु काहनाँव्य सुंद्य काह। मतलब ताकुल तु पास। निकस आव बुथिस रंग वापस। अमि पतु तुल्य विजन पानु तु पतु राजन। विजस आँस्य कुनवुह, तु सु ति पास। राजस द्रायि साड पंदाह फँल्य, याने पंदाह पूर तु अख ओड। असि कोर सॉच। फॉसलु गव जि ओड छुनु मुजराह, यिम गँयि पंदाह बराबर। मतलब राजु ति पास। मे बडेयि ह्यमथ। मे सूंच, दूह छु रुत। सारिनुय छु ताकुल नेरान तु मे क्याजि नेरि नु। मे मोर याशाह कँरिथ तोमलु फल्यन जॉट तु दितिम निकस अथि। येमि किन्य बु पनुनि पार्टी हुंद डिप्टी लीडर ओसुस, तमि किन्य ओस निकुसुय हक म्यॉन्य फँल्य गँज़ुरावनस। निकन गँज़ुरॉव्य, ग्वडु अकि लटि, पतु बेयि लटि। बु ओसुस वॉलिंजि थफ कँरिथ तसुंदिस जवाबस प्रारान। निकन त्रॉव्य तोमलु फँल्य म्यॉनिस अथस मंज़ वापस तु वोनुन, “बाया यिम छी शेतुवुह। न कम तु न जादु।” मे गँयि अक्लु बकल। गव अम्युक मतलब बुय योत छुस फेल। ति किथु कँन्य सपदि? राजन आँस्य पनुन्य सॉरी परचु मे नक्ल कँर्य कँर्य लीख्यमुत्य। सु गछ्या पास तु बु फेल? मे दोपुमख, “क्याहताम गलती छि गॉमुच्च। बु करोवु नवि सरु। अदु यि कुसमतस आसि, ति मेलि।” मे तुल्य दोयिमि लटि तोमलु फँल्य तु येमि लटि दित्य मे गँज़ुरावनु खॉतरु राजस अथि। तँम्य गँज़ुरॉव्य। बराबर आँस्य सदाह फँल्य। मे तुजि वटु मगर निकन द्युत फेश। दोपुन त्रेयिमि लटि छु वोनमुत व्वसतादन। बाक्यव कोर तसुंजि कथि तॉयीद। मे ह्योतुन आँरकु श्रान गछुन। यिथु तिथु तुल्य मे त्रेयिमि लटि ति तोमलु फँल्य तु गँज़ुरॉविम पानय। मगर कुसमतन द्युत नु साथ कँह। यिम द्रायि बेयि जुप्त्य। मे नटेयि जंगु। चूर्यमि लटि बेयि वुछनुक ओस नु सवालुय, मगर पानस सुत्य सूंचुम, “हरगाह बु बगवानस फेलुय आसुहॉ करुन, तेलि क्याजि आसिहे दोयिमि लटि मे ताकुल आमुत?” मे

दोप न, दोयिम्य छु ठीख। मे प्रुछ यारन, “त्रेयिमि लटि कॅम्य व्वसतादन छु वोनमुत ?” तिमन ऑस नु वारु पताह केह। दोपुख, “असि छु लूकन निशि बूजमुत मगर व्वसतादु सुंद नाव छनु पताह केह।” मे दोपुमख, “त्रॅटिव कथाह तेलि। यि दोयिमि लटि द्राव, ती छु पज़र।”

यारन गव म्यानि वननु सुत्य तसलाह। ऑखुर ऑस्य अॅस्य यछानुय जि सॉरी गॅछ्य पास गछुन्य। तिमव कोर म्याॅनिस वनुनस सुत्य पूर पॉठ्य यितिफाक। निकन वोन, “व्वसतादु सुंज मिसाल छि बिजॉती गलथ। यि छि दर अस्ल कॅम्यताम ख्वद गरजन टुड्य फॉलॅवमुन्न।” तु सुती कोरुन मे मुबारख ति। मतलब, दोयिमि लटि हुंद ताकुलुय छु सॅही तु लेहाजा छुख पास। बाक्यव यारव ति कोर मे मुबारख। अमि पतु ह्योत असि प्रक्रम द्युन। असि पतु पतु ऑस्य ज़ु लॅडक तु त्रे कोरि, यिमव ज़न असि नीरिथुय तोमलु पॅल्य हेत्य तुलुन्य। शायद आसिहे तिमन ति अज़ रिज़ल्ट।

वति पकान पकान युस युस ल्वकुट बोड मंदर तु मूर्ती असि नज़रि गॅयि, तथ तथ कोर असि नमसकार तु पेयस परन। येति येति असि सेंदुर लॉगिथ वॅन्य नज़रि गॅयि, तथ ति लोग अथु तु पतु लोग सु अथु पनुन्यन अॅछन। मतलब ओस सिरिफ जि रेडियो प्यठ रिज़ल्ट वनन वोल गोछ सोन रोल नम्बर ति वनुन।

प्रक्रम दिथ येलि अॅस्य कौठ्य दरवाज़स निशि वॉत्य, अति ऑस सब्जी कुनुन्य। निकस ओस माजि वोनमुत हंद अनुन्य। अॅकिस सब्जी वाजनि निश ऑस्य हंदि बॅद्य तारु। असि लोग तस सुत्य बाव करुन। यितिसुय कालस आव अख अडवर ऑनुकी तु तॅम्य बॅर यि हंद पनुनिस जोलुनस तु पिलुनॉवुन अॅठॅनी सब्जी वाजनि कुन। असि लोगुस मॅचलु। दोपुस, “माहरा यि हंद छि असि ग्वडय मॅल्य ह्यॅन्नमुन्न। त्रे कथ बॅरुथ यि जोलुनस ?” ऑनुकी ओस सख तेशल। दोपुन, “मगुज़ मा छिवु खराब गॉमुत्य ? वालोवु येती यीरी पीरी। मे ह्यॅन्न ना मॅल्य यि वटु अॅठॅनी दिथ !” निकस ति खोत योरु अॅछन रथ। दोपुनस, “हे, त्रे मा ज़ॉनिथ अॅस्य शुर्य ? अॅस्य छुनोय यि जोलनु वोलनु त्रेटिथ येतिथुय। स्योद स्योद दि सॉन्य हंद वापस।” वुछान वुछान समेयि अॅद्य पॅख्य लूख। तिमु ज़ु लॅडक तु त्रे कोरि ति अयि ब्रॉह कुन, यिमव ज़न असि पतु तोमलु पॅल्य तुलिथ पनुन कुसमत अज़मोवमुत ओस। बुथ्यन ओसुख रंग जान। शायद आसिहेख सारिनुय ताकुलुय द्रामुत।

अॅक्य बुजर्ग नफरन तु यिमव लॅडकव तु कोर्यव कोर सोनुय तरफ। सब्जी वाजनि ति प्यव सानी कथि तॉयीद करुन। म्वखसर गव ऑनकी जोलनु मंज़ु हंद न्यबर कडुनस प्यठ मजबूर। असि दिन्न अॅठॅनी तस तु सु द्राव। अमि पतु लॉज असि लॅडकन तु कोर्यन सुत्य कथ, तु दरबाराह करान करान द्रायि वापस गरु कुन।

अड वति ह्योत तिमव कोर्यव तु लॅडकव असि र्वखसथ। असि कोर तिमन सॉन्य तरफदॉरी करुनस प्यठ शुक्रिया। तिमव मंज़ु प्यव अॅकिस कोरि ज्वन। दोपुन, “हंद कति छवु ?” असि दिन्न नज़र, मुचुकरी मंज़ु ऑस असि हंद तुलुन्य मॅशिथुय गॉमुन्न। अॅस्य दवेयि वापस। कौठ्य दरवाज़स निशि वॉत्य, अति न ऑस हंद तु न स्व सब्जी वाजेन्य। असि दोप मूद्य व्वन्य। गरि खारन मार दी दी लहा। असि यारव मंज़ु येलि ति कांह अखाह अतुर करिहे, मार ओस सारिनुय प्यवान। सारिनुय हुंघन गरिक्थन ऑस पताह जि यिम छि सॉरी रॅलिथ। खास कॅरिथ ओस असि सारिनुय निकुनिस बाॅय सुंद, यस अॅस्य सॉरी बाॅय टोट ऑस्य वनान, सख बीम। सु ओस नु मार दिनु वख्तु पथ ब्रॉठ वुछान केह। मगर रछान ति ओस सख। यि निकस क्युत अनिहे, ति ओस असि क्युत ति अनान।

असि कॅर वती मिटिंग जि व्वन्य क्या करव। अँठनी ति यियि नु वापस कॅह, हंद कति अनव ? राजन हॉव कमाल हुशॉरी। दोपुन, अगर बूज़िव, मे निश छव अख सँबील। असि दोपुस, वन जल। दोपुन, “गॅणीशु बलु निशि वुछमवु मे अँकिस जायि द्रमुनिस अंदर नुनर खँचमुच। अगर म्योन मॉनिव, तूर्य गछव तु तति अनव ऑठन आनन बराबर नुनर कॅडिथ।” निकस खोत ज़हर। दोपुनस, “पागला! असि छा हंद अनुन्य किनु नुनर ?” राजन वोनुनस वापस, “रछाह है अक्लि कॉम। अनुन्य ऑस हंद, मगर दफ अज़ ऑस नु हंदुय कुनुन्य। अज़ ऑस सिरिफ नुनर कुनुन्य।” निकु गव यि बूज़िथ थोद वँथिथ। दोपुन, “सँबील छि मोकूल। पँकिव कॅरिव जलदी।” अमि पतु त्राँव असि गॅणीशुबल कुन बेयि दव।

अँस्य येलि वापस गरु वॉत्य, दँह आसु बजेमचु। निकुनि बदलु गोस बु बॉय टॉठिस ब्रॉह कुन तु नुनर ब्रॉठ कनि त्राँविथ वोनुमस, “अज़ हसॉ बनेयि नु हंद कुनी। तति ऑस सिरिफ नुनर कुनुन्य। सॉरी बटु अँस्य जोलनु बॅर्य बॅर्य निवान। असि ति अँन्य।” बॉय टॉठ्य तुज नुनर अथस क्यथ। दोपुन, “लॉव नुनराह छि, अस्ल। जान कोरवु।” असि चाव सारिनुय जुव वापस।

बाह बजे ओस रेडियोहस प्यठ रिज़ल्ट। मे ओस पनुनि जायि फ्रुठय। जांगुर कॅरिथ ओस मे दोयिमि लटि हंड ताकुलुय पोज़ मोनमुत, मगर अँदुर्य ओसुस म्वकल्योमुत। यूत यूत रिज़लटुक वख नँज़दीख ह्योतुन वातुन, त्यूत त्यूत ह्योतुन मे ऑस ह्वखुन। मगर माजि शारिकायि ओस रुतुय मंज़ूर। काह बजे वोनुख जि मैट्रिकुक रिज़ल्ट नेरि व्वन्य पगाह। बु गोस यि बूज़िथ ख्वश। रिज़ल्ट पगाह नेरनुक मतलब गव जि पगाह छु बेयि असि परबथ गछुन तु नवि सरु तोमलु पँल्य गँज़रावुन्य। म्यानि खॉतरु ओस यि अख चान्स बेयि। म्यॉन्य बाकुय यार अँस्य नु ख्वश कॅह। तिमन ओस फ्रुठ जि खबर छा, पगाह क्या सपदि ? कस नेरि ताक तु कस नेरि जुफ ?



पास तु फेल

कालु आयि नु मे चेर ताम नैदरुय। युथुय मे नैदरु ऑस ह्यवान पेन्य, बु ओसुस कांह नतु कांह खोफनाक सोपुन वुछान तु वूर्य वूर्य गछान थोद वॅथिथ। अमि पतु सूंच मे जि नैदरु करनी छु गलथ। मे ह्योत लेफि तल बिहथुय यँद्वॉखी पाठ परुन, तु यि पाठ रूदुस बु तोत ताम परान, योत ताम विजन ब्वनु प्यठु क्रख दिच। मे दिच गरि कुन नज़र। पांछ आसु तयार बजुनस। मे द्युत बुथिस पां फशाह तु द्रास यारन सुत्य परबथ कुन।

म्योन अख यार ओस रोज़ान नवि कॅदलु। नाव ओसुस चमन लाल। परुनस क्युत ओस सु असि ति पथुय। मे सुत्य ऑसुस खास यारज़ तिक्याज़ि बाक्युन लॅडकन नाव तु र्यछु कडुनस मंज़ ओस नु असि दूशवन्य कांह मुकाबलु। जय कृष्ण ओस असि निशि आँठ खंड थोद, नाव ओसुस कोरमुत फ़स। मूती लालुनि अँछ आसु हमेशु बासान ज़न शरॉब्य अँछ, नाव कोरुस ठरु। यूसफ़स ऑस अकि दूह ज़रकु बरक करवन्य बँनियान लॉगिथ, नाव कोरुस ज़रबाबु। प्राण नाथस ओस गरि ज़मीन ज़िराथ स्यठाह। सु ओस असि दूहय नवि तोमलुचि तु नवि खादि हुंज़ु कथु बोज़ुनावान। नाव कोरुस खंडु खाद। रशीदस ओस कलस मस कम्य, नाव ओसुस कोरमुत टिनि। क्याह क्याह वनोवु ?

गुरगॅर्य मँहल नैज़दीख वॉतिथ प्यव मे खयाल जि चमनु ति कडोन सुत्य। मे कोर तस आंगनु मंज़ु आलव। तसुंद मोल गव हुशार तु द्राव दारि किन्य। मे वोनस, “माहरा, कति छु चमनु ? असि सुत्य यिया परबथ ?” सु वोथ तोरु कमि ताम बुथि, “तस क्या करुन परबथ गॅछिथ ? सु छु पास।” यि वॅनिथ च़ाव सु अंदर। बु गोस क्युथ ताम ह्यु। बाक्युव यारव वॉल्य मे पॉज़ार जि च़े कथ ओसुय अँमिस आलव करनि गछुन ? मे मँजिमख मॉफी।

चमनस ओस नु असि ब्रॉंटुय रिज़ल्ट द्रामुत कॅह। दर अस्ल ओस तसुंदिस मॉल्य सुंद माम साधु लयि सुत्य। नाव ओसुस काकूजी। काकूजी ओस गाह बे-गाह यिहुंद गरु यिवान तु चमनु ओस तस स्यठाह खँदमथ करान। कॅह मॉल्य सुंदि बीमु तु कॅह पनुनि मतलबु। दपान इम्तिहानु ब्रॉंटुय ओस काकूजी चमनुनिस गरस मंज़ डेरु त्रॉविथ ब्यूठमुथ। चिमटु तु कमंडल ओसुस सुत्य, यथ रॉछ रावठ करुन्य चमनुनस जिमु ओस। येलि चमनुन्य मॉल्य तस चमनुनिस इम्तिहानस मुतलिक वोन, तु सुती यि ति वोनस जि यि माहरा छुनु खास मेहनुथा करान कॅह, काकूजियन वोनस, “क्या छुस करुन पॅरिथ ? गछ कर पनुन्य कॉम। बु दिमय नाबद रछाह पॅरिथ। तमि मंज़ु गछ्यस रछाह रछाह दूहय दिन्य सुबहस नेरनु वख्तु। अदु यि तति लीख्यतन कॅह या मतु लीख्यतन, पास छुस गछुन। गछतु, सेकंड डिविजन थवस बु अँज्य दिथ।” यि सॉरुय दॅलील ऑस मे चमनुनय बोज़ुनॉवमुच़। मे कर्योव पनुन्य किन्य तस ज़ारु पारु जि मे ति नितु काकूजियस निशि, तु सु गॅयोव तयार ति, मगर तसुंद मॉल्य दिच नु तथ वथ कॅह। दोपुनस, यिम राज़ छिनु आसान लूकन बावन्य।

ब्रॉह कुन पॅकिथ समखेयि असि लॅडकु जोराह बेयि। तिम ति ऑस्य परबथ गछान। येलि असि तिमन कालु सपदेमति वाक़हुच कथ वॅन्य, तिमव त्रोव असुन। दोपुख, पास फेल छा आसान वुछुन तोमलु फल्यन ? सु छु आसान वुछुन कनि फल्यन। असि सूंच, असि छि तेलि कालु गॉमुच़ गलती। यिनु अज़ ति बैयि कांह गलती गछि, अमि किन्य ह्योत असि तिमन सुत्य सुत्य पकुन।

गंणीशु बलु नीरिथ वॉत्य अँस्य तथ जायि, येति असि व्वन्य कनि फॅल्य तुलिथ पास फेल वुछुन ओस। हुमव द्रयव लॅडकव वुछ पनुन कुसमथ गवड। अख ओस पास तु ब्याख फेल। युस फेल ओस, सु ब्यूठ कनि थरस प्यठ पथर तु लोगुन वदुन। व्वन्य छुनु ब्याख लॅडकु तस पोशान छ्वपु करुनावनस। असि गव पनुन पास फेल वुछुन मॅशिथुय। बु गोस तस ब्रॉह कुन तु वोनुमस, “हता यारु पतु छा ती पोज़ आसान! बॅल्यकि बगवान च़े ति पासुय करी। व्वथ हे पानस गणीशु सुंद नाव तु दि गरु कुन कदम।” बु ओसुस अँमिस यि वनानुय ज़ि राजन दिच़ मे ज़ीर। कनस तल वोनुनम, “तेलि कथ छु असि ति पनुन पान रंदि कडुन। यि कुस्मतस आसि, ति वाति। वुन्यकि प्यठय क्याज़ि ह्यमव परेशॉनी मॅल्य?” मे दोपुस, “तेलि क्या, पास फेलुय वुछव ना?” सु वोथ दर जवाब, “अहानू, येति अँमिस छुख नॅसीहथ करान ज़ि पतु छा ती पोज़ आसान, पानस क्याज़ि छुख नु वनान?” मे सूच ज़ि राजु ति छु पोज़ुय वनान। मगर च़कि ओस तस पानस ति अँज्यकिस फ़ठ।

लॅडकु ज़ु द्रायि वापस गरु कुन। फेलु वॉलिस अँस्य वुनि ति गित्य गछान मगर यार ओसुस दिलासु दिवान। तिम नीरिथुय बुलॉव असि बोनि तल मीटिंग ज़ि असि छा अज़ कनि फॅल्य तुलिथ गँज़रावन्य किनु नु, तिक्याज़ि हुमिस लॅडकु सुंद वदन बुथ वुछिथ ओस असि न्यसुब जुव नीरिथ च़ोलमुत। निकन द्युत फॉसलु। दोपुन, अँस्य त्रावव यि मामलु स्योद माजि शारिकायि प्यठ। स्वय दियि तार। बॅल्य कथ छि वॉलिंज अथस क्यथ थवुन्य? सारिनुय आयि अथ कथि बराबँदी।

प्रक्रम दिथ वॉत्य अँस्य कौठ्य दरवाज़स प्यठ। कालुच सब्ज़ी वाजेन्य अँस अज़ ति तँथ्य जायि बिहिथ। असि दिच़ ओरु योर नज़र। सु आँनुकी गव नु कुनि नज़रि। अचानक पेयि सब्ज़ी वाजनि मे प्यठ नज़र। तमि लोय नाद, “हयो गोबराह!” अँस्य गँयि तस ब्रॉठ कुन। तमि वॅड चंदु मंज़ु अँटॅनी तु दिच़ुन असि। दोपुन, “त्वहि गँयिवु ना राथ हंद येती मॅशिथ। स्व कुन्य मे बेयिस खँरीदारस त तुहँद्य पाँसु आयि वापस।” अँस्य गँयि ख्वश। निकन दोप, “हयो, दँसलाबय द्राव जान, दूह हबा नेरि वारु कारु रुत। मे छुवु बासान, अँस्य आसव सॉरी पास।” मे कोरुस तॉयीद। अमि पतु वॉत्य अँस्य असान तु गिंदान गरु वापस। डेरु लोग निकुनि गरि।

मसाह गव असि ओड गंटु गरु वॉत्यमुतिस ज़ि नेबुर्य गव आलव “हयो निका!” असि दिच़ दारि किन्य नज़र। निकुन यार अँली मीर ओस आंगुनस मंज़ अख अखबारु वरुखाह अथस क्यथ रँटिथ। असि वुछिथुय च़ाव सु दव तुलिथ अंदर तु दोपुन निकस कुन, “माजि हुंद कसम, अज़ त्रावथ नु अँकिस रच़ि। अज़ छय काकनि हुँदि अथु गाड ख्यावुन्य। बा ख्वदा बोज़ुनावथ रुच़ खबर।” निकन कोरुस गाड ख्यावुनुक वादु। अँली मीरन कोड अखबारु वरुख तु त्रोवुन असि ब्रॉठु कनि। यि ओस सानि रिज़ल्टुक अखबार। अँली मीरस ओस मोल अँकिस अखबारु प्रेसस मंज़ कॉम करान तु तँमी ओस अख वरुख सुबहॉय गरु वोलमुत। असि दिच़ अखबारस नज़र। असि आयि नु पनुन्य रोल नम्बर ज़न बोज़ुनय। अँली मीरन दिच़ अखबारस बेयि थफ तु रोदुन अथस मंज़। दोपुन, “हता वुछान क्या छिवु? सॉरी छिवु पास। बु ति पास।” अमि पतु हॉविन असि वारु पाँठ्य पनुन्य रोल नम्बर। पँज्य पाँठ्य अँस्य अँस्य सॉरी पास। असि कोर तस नालुमोत। यीतिस कालस लँज सारिनुय पताह ज़ि अँस्य गँयि मैट्रिकस पास। सारिनुय हुँद्य गरिक्य समेयि निकुनि गरि। बाँय टोट ति ओस नु व्यच़ान कुनि। थर्ड डिविजन यिनस प्यठ कोरुन असि लानु तानु मगर अँदुर्य ओस ख्वश। अँली मीरुन्य डिमांड बूज़िथ द्राव सु पोत खोरी वापस बाज़र गाडु अनुनि। अमि दूह लोग निकुनि गरि मॉलु।

गाड वुछिथ कस यिथिहे नु ऑसस पोन्व ? मगर बु ओसुस रछाह दिल मलूल। चमनुन रोल नम्बर ओस नु अखबारस मंज कुनी। मतलब सु ओस फेल। यि ह्यकव नु वॅनिथ जि तस द्वहदिश नाबद रछ दिनस मंज कॅरा तसुंघ मॉल्य कांह कोतॉही, किनु काकूजियुन नाबदुय ओस गलथ।

रेडियोहस प्यठ रिज़ल्ट बोज़ान बोज़ान छु अर्यन दर्यन फ़ठ गछान। येलि रिज़ल्ट वनन वोल परान छु 'वन वन टू, वन वन फोर, वन वन सेवन, वन टू वन' वॉलिंजि छि दुबुरारय बडान तु शाह छु बंद गछान। मे ऑस्य यिथ्यन वख्तान प्यठ कम कम हटु कटु जवान कूनन चामुत्य वुछमुत्य। सारिनुय बोज़न वाल्यन छि अमि सातु बुथ्यन लेदरि छठ आसान फीरमुच। अँस्य ऑस्य रिज़ल्ट नेरुनस बेसबरी सान प्रारान ज़रूर, मगर फ़टु वरॉय। अखबार नय आसिहे वुछमुत, असि ति आसिहे वॉलिंज ऑसु किन्व खँचमुच।

बाह बजे त्रोव असि रेडियो। रिज़ल्ट वनुन गव शोरू। अँस्य ऑस्य ठाह ठाह कॅरिथ असान तु गँज़रावान जि येमि नम्बरु प्यठु यथ नम्बरस ताम कॅच पेयि। निकु ओस असि सुत्य सुत्य वनान जि यि कुस स्कूल गव तु अमि पतु कुस स्कूल यिथि। येलि सोन नम्बर नज़दीख ह्योतुन वातुन, असि व्वशल्यव बुथ। फ़ठ रूद जि यिनु वनन वोल सोन रोल नम्बरुय वनि नु! मगर ति सपद्यव नु कॅह। सोन नम्बर आव पनुनि वारि प्यठ। राजन दिच क्रख, “असली मुबारख हबा छुवु व्वन्य।” अमि पतु मतु पृछ्यतव जि असि काँत्याह पाँसु वॅट्य पास गछुनस, तु अँली मीरन कॅच गाडु गनि खेयि! मगर अफसूस, चमनु ओस रेडियोहस प्यठ ति फेलुय। मे दोप वाय, मोल हय वथ दियिहेस, असि सुत्य आसिहे सु ति परबथ आमुत। अदु यिथु पाँठ्य माजि शारिकायि अँस्य कॅर्य पास, तिथय पाँठ्य करिहे तस ति।



खांदर साल

कालिजु प्यठु गरु वसान वसान येलि अँस्य देवान बाग वॉत्य, अति पेयि असि दूरि अँकिस सायबानस प्यठ नज़र। सायबानु ओस नोव तु रंगुदार। राजन वोन, “कस ताम छु खांदर। वुमराह अख गव खांदर साल ख्यनुसय।”

मे कोरुस आंकार। खांदर सालुक नाव बूज़िथुय ओस मे ति ऑसस पोन्स यिवान। राजन थोव मे फेकिस प्यठ अथु तु दोपुन, “असि छु ना युहुस, काँसि अंगस ऑशुनावस खांदर?” मे वोनस, “कति छु?” राजन त्रोव व्वश।

रछाह पँकिथ वॉत्य अँस्य तथ सायबानस निश। सायबानु ओस सडकि हुंद अख हिसु बंद कँरिथ लागनु आमुत। सडकि बुथि आसख बजि बजि कनि थविमचु युथ नु कांह गाडि वोल तपॉर्य नीरिथ हेकि। जु त्रे नफर ऑस्य तँजीरु गंडान तु केह ऑस्य सायबानस अँदर कनि सतरंडु तु मसनंद वाहरावान।

नेबरु कनि ऑस्य केह जवान ओरु योर दवु दव करान तु पांछ शे बुज़र्ग ऑस्य व्वदुनी दरबार करान। सायबानस अँदर कनि ऑस्य लँडकु तारु वाव मालु लागान मगर अथ वथ ज़न ऑसुख नु यिवान केह। मे गव मथ जि बु हावु यिमन वाव मालु किथु कँन्य छि यिवान गंडनु मगर राजुन बुथ बुछिथ, खेयम कथ। सु ओस अक्सर वनान, जि बु छुस हंगु तु मंगु ज़हरबादस जंग छुनान।

राजन कोर मे अँती रोज़नुक इशारु तु वुछान वुछान त्रॉवन सायबानस अंदर टुख। बु रूदुस सडकि प्यठ व्वदुनी। येलि नु सु वारियाहस कालस वापसुय आव, बु गोस तस छांडनि। राजु ओस कस ताम बँडिस नफरस सुत्य कथ करान। तँम्य कोर मे वापस नेरनुक इशारु। बु द्रास वापस तु रूदुस नेबरु कनि।

मिनठ पंदाह मरु गँछिथ आव राजु वापस तु वोनुन, “कस ताम गूपी नाथस छु नेचिविस खांदर। अज़ छख माँज़िराथ तु नेनि साल छुख तयस प्यठ कोरमुत। दपान अलु पलु छि बाह सिन्य रननु आमुत्य। आंचार तु ज़ामुत दूदु प्यालु गँयि अलग।”

“मगर चे कँम्य वँनी यि दँलील?” मे पृछुस। राजन वोन, “मे लॉज सायबानु वॉलिस दँदर तु तँमी वोन। अखतुय ओस वनान जि असाँम्य छे स्यठाह अँमीर।”

ज़ामुत दूदु प्यालुक नाव बूज़िथुय आव मे ऑसस वारय पोन्स। मे ऑस ल्वकुचारु पानु प्यठय, ज़ामुति दूदुच सख कमज़ूरी।

बुथि ओस अख वानु वोल येत्यथ असि निकस प्रारुन ओस। सु ओस परान एस. पी. काल्यजि तु कालिजु प्यठु यिथ ओस सु दूहय अँतिथुय समखान। अति प्यठु ऑस्य अँस्य यिकुवटु गरु गछान। मगर अज़ ओस नु निकु प्रार्योमुत केह। दुकानदारन वोन सु द्राव स्योदुय गरु तु त्वहि वोननुवु तूर्य युन।

किताबु गरि त्रॉविथ वॉत्य अँस्य स्योदुय निकस निश। सु ओस पतलूनस कुंघ करान। असि कोर तस निश दुहुक रपोट पेश तु सुती वँनिस सायबानुच शेछ। येलि राजन तस वोन जि कस ताम गूपी नाथस छु नेचिविस खांदर, निकस आव असुन। दोपुनस, “सतीशस छुना बाँयिस खांदर।” असि ति छु सालस गछुन।”

सतीश ओस निकस काल्यजुक यार मगर असि सुत्य ऑसुस नु तिछ यारज़ केह। असि दोपुस, “सु छुय यार च़े। असि क्याह?” मगर तँम्य मोन नु। दोपुन सतीशस छे ना पताह, अँस्य छि साँरी यिकुवट। तँम्य छु मे तुहँदि खॉतरु ति वोनमुत। बु ओसुस अज़ काल्यजि प्यठ सुली आमुत तस मदथ करनि।

निकन थँव चुनि कुंघ पॉतरि प्यठ तु वोनुन, ‘गूपी नाथ वोल गव सतीशस मोल। सतीशिन्य पॉठ्य छुस बु ति तस बाँयिगाशुय वनान। तँमिस ति छि तुहँज़ पताह।’

निकन थोव पतलून किलिस अलूंद, तु लॉजिन कँमीज़ि कुंघ करुन्य। असि कुन वुछिथ वोनुन, “तोह्य ति कँरिव पनुन्य पलव तैयार, पतु गछि च़ेर।”

मे ओस वख्ताह अख गोमुत खांदर साल ख्यनुसुय। मे कँर सतीशस तु निकस ऑही। राजु ओस ज़्यादय पहन ख्वश। दोपुन, “बलायि छुनुस, बु ओसुस डुडु पॉठ्य ति गछुनस तैयार। मगर वन्य गव जान ज़ि यज़तु सान गछव।’ निकस ओस सु तिथु पॉठ्य बुथिस कुन वुछान ज़न तु तसुंज सतन पीर्यन मिनथ ऑसुस।

साल ओस ऑंठि बजि मगर अँस्य वॉत्य सती बजि। खांदर वॉल्य ऑस्य दवु दव करान। सायबानस नेबरु कनि आसु अँकिस जायि कुरसियु लॉगिथ। केह बुज़र्ग ऑस्य बिहिथ सियाँसथ दगान। शेख अबदुल्लाहन क्याह वोन, तु मीर कॉसिमन क्याह वोन? पॉकिस्तानन क्याह वोन यू एन ओ हस मंज़ तु हिंदुस्तानन क्याह द्युतस जवाब। असि ऑस नु तिहँज़न कथन सुत्य कांह दिलचस्पी। अँस्य रूद्य तिमन दूरय पहन वदुनी। निकु च़ाव अंदर सतीशस छांडनि।

रछ खंड गँछिथ आव निकु सतीशस सुत्य। मे वोन सतीशस, ‘असि सारिनय साल करुनस प्यठ शुक्रियाह।’ सतीशन वोन, ‘क्याह रोवुव। बु छुस ना त्वहि बोय?’ असि गव बुथ ब्वन कुन। निकन बेहनाँव्य अँस्य अँकिस जायि, तु पानु द्राव सतीशन सुती वापस।

केह काल गँछिथ आव निकु बेयि वापस। सुत्य ऑसिस नफर जोराह। असि दोपुन तिमन नमस्कार करुन। असि कोर। तिमव कँर असि ऑही। तिम नीरिथ वोन असि निकन, अख ओस सतीशुन माम तु ब्याख तसुंद यार।

साडि ऑंठि बजि प्यठु हेतिन सालुर्य यिन्य। ग्वडनिची छवकि सुत्य च़ायि अँस्य ति अंदर। अँदरु ऑस्य बतु ख्यनुक्य पँट्य त्रॉविथ। निकन रँट अंद कुन जाय तु कोरुन असि इशारु। अँस्य बीठ्य पथर। अँडिस गंटस मंज़ आयि साँरुय सब बँरिथ।

लडकु जोराह आयि ब्रॉठ ब्रॉठ अथु स्वरशावान, तु पतु पतु ऑस्य थालु वॉल्य थाल त्रावान। युथुय रोगन जोश त्रावन वोल म्याँनिस थालस निश वोट, मे वोनुस बु माहरा छुस वशनँव्य।

तँम्य त्रोव रोगन जोशु फोल वापस, थालस मंज़। मे कुन कँरुन व्यखचुय नज़राह तु दोपुन, “वशनँव्य, यूत ल्वकुट! चु मा छुख इम्तिहान दिथ आमुत?” मे दोपुस, “न माहरा, बु छुस ल्वकुचारु प्यठय वशनँव्य।” म्यान्यव साँथियव कोरुहँस तॉयीद।

रोगन जोशु वॉल्य कोर दूरि अँकिस नफरस आलव, “हे गाशु लाल।” गाशु लालन दिच नज़र। रोगन जोशु वॉल्य वोनुस, “येति हसाँ छुय वशनँव्य अख।” गाशु लालन कँर कस ताम बेयिस सुत्य कथ तु तमि पतु वोनुन रोगन जोशु वॉलिस, “बाल जी, तलु साँ बेयि वुछ, बेयि मा छुय कांह वशनँव्य।”

यीतिस कालस लॅज बाल जियस पतु बाक्य सिन्य बाँगरावन वाल्यन हुंज लॉन। मे खोवर्य युस नफर बिहिथ ओस, तँम्य वोन मे, “चे कुस साँ तफरीक तुलुथ। येलि वशनँव्य ओसुख, तेलि कथ ओसुय सालस युन।” मे गव तसुंद यि वनुन सख बरतबाह। मे वोनस, “बु क्या पानय आसु ? मे माहरा छु सतीशन साल कोरमुत।” तँम्य ह्यचोव बेयि क्याहताम वनुन जि बाल जियन दिच क्रख, “हे बेयि छुव साँ कांह वशनँव्य ?”

चोरव नफरव तुल अथु थोद। बाल जियन गँजरॉव्य ‘अख, जु, त्रे, चोर।’ तमि पतु वोन तँम्य गाशु लालस, “यिम माहरा छिवु चोर।” गाशु लालन कोर बेयि कस ताम नफरस सुत्य मशवरु तु वोनन असि कुन, “वॅलिव साँ वशनँव्य साँरी येमि तरफ।”

तमि पतु कॅर तँम्य हुमि अंदु बिहिथ नफरन गुजॉरिश जि तोह्य त्रॉव्यतव येत्यथ यिमन जाय तु तोह्य बिहतव यिहँजि जायि।

सबि गॅयि अफरातफरी। कॅह छि ओर गछान तु कॅह योर। मिनट पांचु मरु गॅयि अथ कारवायी मंज ज़ायि। तमि पतु गॅयि स्युन बाँगरावनच कारवायी बेयि शुरू।

नवि जायि ब्यहान ब्यहान आयि, असि सुत्य बेयि जु नफर। व्वन्य गॅयि अँस्य शे। पोन्स दिनु वोल येलि बजि सबि अथु स्वरशाँविथ म्वकृत्यव, अदु आव सु सानि सबि। कॅह काल गॅछिथ त्रॉविख असि थाल तु मे खँच वॉलिंज बोठ।

अँस्य आँस्य व्वन्य प्रारान स्युन त्रावनस। मगर साँनिस कुसस ओर रछाह चेरय। मे त्रॉव निकुनि सबि कुन नज़र। सतीशु ति ओस निकस सुती ब्यूठमुत। तँम्य होव असि अथु सुत्य इशारु जि ठीख पाँदय खे ज्यवु। असि होवुस वापस इशारु, मतलब, ठीख छु।

स्युन खेनु वाल्यन हुंजि सबि आँस स्युन बाँगरावन वाल्यन हुंज लॉन लॅजमुच। रोगन जोश, मछ, यखुन्य, चोक चरवन, हाख, मुजि चेटिन्य, नदुर्य चुरमु बेत्री। बु रूदुस यिहँद्य सिन्य गँजरान तु पनुनिस थालस वुछान।

अथ सबि मंज गव बतु बाँगरुन ति शुरू। पतु पतु ओस वॅलियि वोल पकान। मे बासेयि पनुन्य ब्छि तेज़ान मगर करुहाँ क्या ? म्योन थाल ओस वुनि ति कोरु होखुय तु बाँगरुन वाल्यन हुंद ओस नु पय पतहय।

इन्तिज़ॉमी कारकुन आँस्य, ओरु योर तु योरु ओर करान, मगर असि कुन ज़न आँस नु काँसि नज़रुय प्यवान। मे ह्योत तथ द्रहस बद रद वनुन येमि द्रह बु वशनँव्य बन्योस। दर-अस्ल ओस नु मे वशनँव्य बननुक शोख कॅह, मगर म्योन ज़ातुक वुछिथ ओस काक महाराजन मे स्युन ख्योन मनाह कोरमुत।

मे आँस्य तसुंद लफ़ज अज़ ति ज़बाँनी याद। येलि म्यानि माजि तस, म्योन ज़ातुक होव, काक महाराजन कॅर तथ अकाँय नज़र तु वोननस, “बचस छु हना ग्वब्यर। जु चीज़ थव याद। अख छु यि ब्रसवारि ब्रसवारि यँद्रॉखी पाठ परुनावुन तु बेयि छु यि स्युन ख्योन त्रावुनावुन। पतु वुछख च़ु यि मा यियि अथि कुनि। फर्शु प्यठु खारी अर्शस।”

मे दोद अँदरी माज़। आँठि दहि दोह्य ओस कॅह्यताम कॅह्यताम नेनि फोल अख मेलान बतस सुत्य, तमि निशि ति छोल अथु। म्यानि माजि ओस काक महाराजुन स्यटाह रोब। सु ओस तस बोड ह्यु प्यँत्रु ह्युहुर। नँतीजु द्राव, जि बु बन्योस वशनँव्य, ज़बरदस्ती!

काकु महाराजुनि अथ कथि ओस कमुय काल गोमुत जि गाडु बतुक वख वोत। म्यॉन्य मातामाल ऑस्य गाडु बतु दिवान तैयस प्यठ। म्यॉन्य नान्य ऑस अमि दूह सारिनुय नॅज़दीखुक्यन अंगन ऑशुनावन साल करान। अमि दूह ओस पॅज्य पॉठ्य म्यानि मातामालु मॉलु लगान। बॅड्य यक तरफ, अॅस्य शुरी ऑस्य शुराह सदाह आसान।

म्यॉन्य नान्य ऑस पनुन्यव अथव गाडु रनान। मुजि ऑसुस सुत्य त्रावान। इनसान ओस गाडु म्वकुलॉविथ अॅडिस गंटस, अथस तु थालस ल्यवान। बु ओसुस नानि स्यठाह टोट। बु ओसुस ग्वडय थवान सरु कॅरिथ जि मे क्युत रोजि अख गाडु गॅन्य, पगाह सुबुहस किच ति। येलि बु यि कथ नानि ओसुस वनान, स्व ऑस मे हति हति लटि बलायि लगान।

मगर येमि वॅरियुक गाडु बतु रूद मे वुमरि प्यठ याद। मे द्यतुख बतु हाकस तु स्वचलि सुत्य। सॉरी ऑस्य टास कॅड्य कॅड्य गाडु ख्यवान। बु ओसुस सारिनुय हुंदिस चाँटिस कुन वुछान, तु व्वश त्रावान। मे ह्यमथ दिनु खॉतरु खेयि नु अमि दूह म्यानि माजि ति गाडु। मॉज ... मॉज कति बनि!

येलि राथ गॅयि सॉरी शॉग्य। मे ऑस नॅदुर गॉब। मे आसु प्रथ तरफु गाडय गाडु बोज़नु यिवान। येलि जॉरिस प्यठ वोतुम, बु वोथुस याशाह कॅरिथ तु चास ल्वति ल्वति चोकस मंज़। सारिनुय ऑस मस नॅदुर। मे तुज अख गाडु लॅट काकुदस वॅलिथ तु ब्यूतुस चूरि चूरि लेफि तल खेनि।

मगर चकि मे कुस्मथ खराब, मे गव गाडि कौड, हॅटिस मंज़ बंद। ग्वडुन्यथ कोर मे दमुय तु रूदुस ल्वति ल्वति चास करान। येलि नु तमि सुत्य कांह फर्क पेयि, मे चॅज बडि क्रख नीरिथ। म्यॉन्य क्रख बूज़िथ गॅयि सॉरी हुशार। पतु मतु पृछ्यतव कुस तुफान वोथ। होछी बतु टीर आपुरख मे तु कौड वोथ ब्वन मगर मार दी दी थॅविख मे डॅकरु कॅरिथ।

म्यानि नानि गव नु म्योन मार ख्योन बरदाश। तमि त्रोव पनुन पान मे प्यठ तु लोगुन वदुन। मे कॅर छ्वपु। मगर काकु महाराजुनिस वनुनस च्वचि करनुक द्राव बुर नॅतीजु। बु गोस अमि वॅरियि फेल। तमि पतु रूदुस बु, ज़बरदस्त पॉठ्य वशनॅव्य।

म्यॉनिस सॉचस लॅज ज़ीर। गाशु लाल आव ब्याख नफर ह्यथ असि निश तु वोनुन तस, “शिबन जी, तुल साँ थाल।” शिबन जियन हेत्य, सॉन्य थाल वापस वटुन्य।

मे त्राव पानस सुत्य वॉलिस कुन नज़र। तस तोर फिकरी जि थाल थोद तुलनु सुत्य गोस बु परेशान। तॅम्य वोन मे कनल तल, “अॅस्य छि ना कमुय। यिम अनन ओरय थाल बॅरिथ।” मे खॅच वॉलिंज बोठ। शायद आसिहे गाशु लालन यि कथ ब्रॉटुय वॅन्यमुच तु मे आसिहे नु बूज़मुच। बोज़ हॉ ति किथु पॉठ्य ? बु ओसुस ना गाडु बतस सन्योमुत!

दहि पंदाहि मिनटु पतु आयि त्रे नफर सॉन्य थाल ह्यथ तु थॅविख असि ब्रॉठ कनि। दमु ओलुव, व्वज़ुज चामन, लेदुर चामन, च़ोक्य वांगन, नदुर्य, बेत्री अलावु ऑस्य नदुर्य चुरमु तु म्वंजि आंचार ति। मे वुछ नु पथ ब्रॉठ कॅह तु ह्योतुम बतु ख्योन।

अॅथ्य मंज़ पेयि मे निकस कुन नज़र। सु ओस दोयुम बोड रोगन जोशु फोल अथस मंज़ रॅटिथ, राजस माज़रथ करान, तु बाँगरन वॉलिस इसरार करान, जि तस ति त्राव। राजु गव मजबूर ब्याख फोल रटनु बापथ।

थाल असि ब्रॉठ कनि थँविथ आव नु असि निश कांह यि पृछनि जि तोह्य मा हेयिव बेयि केंह। सॉरी ऑस्य स्युन ख्यनु वालिनय ल्वलमतु लाय करान। मे प्यव ह्यस, दूद प्यालु नय द्युतुखुय नु असि। मे कोर अँकिस इन्तिजॉमियस आलव तु वोनुमस, “माहरा दूद प्यालु गोवु मँशिथुय।”

तँम्य कॅर बेयिस अँकिस शेछ तु तँम्य त्रेयिमिस अँकिस। मगर दूद प्यालु ह्यथ आव नु कांह। अचानक पेयि मे गाशु लालस प्यठ नज़र। बु गोस तस निशि तु वोनुमस, “माहरा, असि म्यूल नु दूद प्यालय।”

गाशु लालन त्राँव मे दोलु नज़र। दोपुन, “दूद प्यालु कति छि?” मे वोनुस, “माहरा, ऑदी ह्य असि वुरबलु प्यठ पताह कोर जि दूद प्यालु ति छि।” गाशु लालस व्वज़ल्यव बुथ। मे थोवुन फेकिस प्यठ अथु तु दोपुन,

“गोबराह! दँलील छि यिथु पॉठ्य जि ज़ुय हथ दूद प्यालु ऑस्य बनॉव्यमुत्य मगर ग्वडनिची सवि छि डाय हथ नफर। अड्यन दिमव तु अड्यन दिमव नु, ति मा गछि जान। अमि म्वखु कोर फॉसलु जि दूद प्यालु दिमवुय नु। अज़ छना त्रठ। असुल सालर छि पतु यिवान, डुडु छि आसान ग्वडय बिहिथ। व्वन्य हय रँन्यमुतिस पाकृवमुतिस बराबँदी यियि तु किथु पॉठ्य।”

म्यॉन्य हालत ऑस वुछिन्य लायख। मे ज़न ओस ज़ुव द्रामुत तु दूद प्यालस मंज़ुय ब्यूठमुत। म्योन बिचॉर्य बुथ वुछिथ वोन गाशु लालन मे कनस तल, “मे तोर फिकरी, म्यॉनिस रँवी जियिन्य पॉठ्य छुय च़े ति ज़ामुत दूद स्यठाह टोट। म्वकल बतु ख्यथ, बु दिमय च़े अख प्यालु लोत पॉठ्य। मगर खबरदार छुय, यिनु येति सु कुनि जायि नोन कडख। गरु गँछिथ खेज़ि।” मे कोर ज़्यूठ आंकार।

बु वोतुस वापस पनुनिस थालस प्यठ। मन ओसुम परेशान। यिनु गाशु लाल मे दूद प्यालु दिनु वरॉयी नेरि? सुती सूंचुम, न न, ति बनि नु। गाशु लाल छु रुत इनसान। सतीशस पेयि मे प्यठ नज़र। इशारु सुत्य प्रुछ तँम्य, क्याह? मे वोनुस सोरुय ठीख।

मे ऑस गाशु लालुन्य कथ फीर्य फीर्य यिवान च्यतस। यस इनसानस नु सालस पृछुखुय, तस ओसा तपालि युन? यि गँयि ना पनुनिस पानस खजालथ करुन्य। पेयख त्रठ।

बतु ख्यथ द्रास बु न्यबर कुन। म्यॉन्य यार ति द्रायि। मे ह्योत गाशु लाल छांडुन। मगर गाशु लाल आव नु मे अथी। मे प्रुछ अँकिस नफरस, माहरा गाशु लाल कति छु? तँम्य द्युत नु म्यानि कथि जवाबाह केंह मगर म्यॉनिस कलस प्यठ थोवुन अथु तु वोनुन, “चु मा छुख जिगरि हुंद नेचुव?”

तस गव क्याहताम ब्रॉथ। मे वोनुस न माहरा, बु छुस काकनि हुंद नेचुव। सु द्राव। अमि ब्रॉठ जि बु पृछुहव तस सु कुस ओस, निकन कॅर मे नरि थफ तु कोडुनस अँकिथ कुन। दोपुन, “दरबारदॉरी छे नु लागुन्य, असि छु नेरुन। मे वोनुस, मगर गाशु लालस पेयि ना समखुन। सु गछि ना दरबुदर मे छांडान छांडान! बेयि सतीशस समखव ना! सु कोत गव?”

‘सतीशस क्याह करख? सु छु निनु तु हेनु आमुत। तस छा कम कॉम?’ वोन निकन। अमि पतु द्रायि ऑस्य गरु कुन।

वति पकान प्रुछ राजन निकस, ‘पगाह येलि बु कालिजि प्यठ यिमु, बु गछा सतीशस निश, केंह कॉम मा आस्यस। सु बिचारु कृतिस वाति?’

निकस खोत बुथिस रथ। दोपुनस, कुस सतीशु ? चँ मा छुख वनु वोथमुत ? बु ज्ञानखुय नु यिम खांदर वॉल्य। मे ति ओस तुहंघ पॉट्य दहली यि सायबानु वुछमुत तु बु ति ओसुस अथ अँदरु नेबरु चकर वॅरिथ आमुत। मे ति ओस साल ख्यनस मॉल तु त्वहि ति। व्वन्य क्या चूर वॅरमु ?

मे प्यूर बुथिस व्वशलुन। मे पृछुस, “मतलब! यि ओस ना सतीशुन गरु ? चे दोपुथ ना सतीशस छु बॉयिस खांदर ?’

‘सतीशु छु बसान नर्सिंग गडु। तस कति गव बोय पॉदु ? यि ति ओस साँनी पॉट्य डुडाजि सालस आमुत। मे ओस अँमिस ग्वडय थोवमुत सोरुय वॅनिथ।’ वोन निकन।

‘तेलि सु सतीशुन माम ?’ मे पृछुस।

‘सु ओस नु सतीशुन माम केह। सु ओस ज़ूल मालु लागन वोल। मे ओन सु ज़ोरु त्वहि निश युथ नु त्वहि कांह शख गछि।’

मे चँज खवरव तलु मेच नीरिथ। राजस ओस बुथ केहन्योमुत। निकन द्युत मे कलस फश तु वोनन, ‘त्राव कथाह। यिमन चीज़न लगे नु पतु सनुन।’ मे वोनस, ‘मे गॅयि ना व्वन्य ब्याख परेशॉनी। बु छुस सॉचान, यिनु गाशु लाल दूदु प्यालु ह्यथ मे छंडान छंडान गरु वाति तु सोन सोरुय ओल वांगुन नेरि नोन।’



सुह शिकार

कथ ओस स्यटाह सँगीनु। पज़र हय बूज़िव मे ओस बुथ्युक रंग कर ताम ज़र्द गोमुत, मगर 'सिको दिल कर', याद कॅरिथ ओसुस बु बोहोदुर आसनुक बास दिवान। सानि जमॉच मंज़ु सेहतु हिसाबु सारिवुय खोतु सरस परवेज़ ओस अँदुरी क्याहताम परान। मे युथुय तस ज़ीर दिच, सु आव ज़न तु मे खेनि। मगर ज़ेवि ह्योकुन नु कैह वॅनिथ। जलाल दीन तु राज नाथ ओस्य अख अँकिस तिथु पॉठ्य थफ कॅरिथ ज़न तु अलग न गछनुक कसम ओसुख ख्योमुत। जय कौल ओस ह्यमथ सौँबुरावनु बापथ सिग्रेटस दामाह दामाह दिवान मगर यि नु खयालय ज़ि सिग्रेट मा ओस ज़ालुनय।

गुलाम रसूल ओस क्याहताम सौँचान, शायद हालातन साम ह्यवान। सु ओस टीम लीडर, अमि किन्य ओस सौरुय ज़िमवॉरी तँस्य। हनीफ खानस ओस बुथ व्वज़ल्योमुत, मगर ज़्यव नदारद। यि ओस नु समजुय यिवान ज़ि सु छा फ़टु सुत्य व्वज़ल्योमुत किनु जोश छुस आमुत।

ख़ुम लूठ अकि अँदु तुलिथ, दिच परवेज़न बेयि नज़र। अजि बरि मँज़्य लोगुस बु ति न्यबर कुन वुछनि मगर वॉलिंजि थँवम चीरु थफ कॅरिथ। सुह ओस ज़ोतवुनि अँछ कॅरिथ असी कुन वुछान। फ़टु सुत्य ओस मे सुह संज़ अकाँय अँछ यिवान बोज़नु मगर गुलाम रसूलन वोन दूशुवय अँछ छस ज़ोतान। कथ करुनस ओस नु इजाज़थ कैह। यि सौरुय ओस इशारव सुत्य यिवान वननु।

गुलाम रसूलनि वननु पतु वुछ मे बेयि अकि लटि वारु पॉठ्य। व्वन्य आयि मे ति सुह संज़ु दूशुवय अँछ ठीख पॉठ्य लबनु। राज नाथन ति कोर अथ कथि तॉयीद। जलाल दीनस आसु नु अँछ यिवान अथी मगर तस ओस सुह सुंदि त्रेश च्यनुच आवाज़ साफ कनन गछान। तँम्य वोन असि कनस तल, "बा ख्वदा छुवु सुह आबस ख्वलुव कॅरिथ त्रेश चवान। बु छुसवु येत्यथ बिहिथ ति तसंज़ु आवाज़ बराबर बोज़ान।" जय कौलस आयि नु तसंज़ि कथि सुत्य बराबँदी कैह। दोपुनस मे छु फिलमन मंज़ वारु वुछमुत, सुह छुनु ज़हुन्य ख्वलुव कॅरिथ त्रेश चवान।

जलाल दीनन हेचोव तस सुत्य तकरार करुन मगर गुलाम रसूलस कुन नज़र प्यथ कॅरुन छ्वपु। अकि लटि त्रॉव असि बेयि बरि मँज़्य नज़र। अनि गटु ओस ज़बरदस्त। अँछन मूरन मूरन दिथ ओस्य अँस्य यि वुछनुच कूशिश करान ज़ि सुह क्याह करि व्वन्य।

राज नाथस पथ कुन दकु दिथ आस बु ब्रॉह कुन। मे वुछ सुह वारु कारु त्रेश चवान। अमि पतु वोथ सु थोद तु कोडुन काड। तसुंद बाडव वुछिथ गव मे हॉबथ। हालांकि अनि गटि मँज़्य ओस नु तसुंद पान बराबर यिवान बोज़नु कैह मगर तसंज़ छाय ओस साफ बोज़नु यिवान। छायि हिसाबु आसिहे सु शे फ़टु ज़्यूठ।

मे युथुय तसुंदि काड कडनुच शेछ परवेज़स वँन्य, तँम्य ति दिच खोचान खोचान बेयि नज़र। ग्वडु ग्वडु आव नु तस कैह अथि। सु ओस वुनि ति वनान ज़ि सुह छु त्रेशुय चवान। मगर येलि तँम्य वारु साम हेच, तँम्य वुछ वारु कारु सुह खडा गोमुत। तसुंदि हिसाबु ओस सुह पांचय फ़टु ज़्यूठ।

अचानक दिच राज नाथन क्रख 'हयो मूद्य हा!' अँस्य आयि अख अँकिस प्यठ लायिनु। काँसि आव नु समुज ज़ि राज नाथस कथ प्यठ चँज क्रख नीरिथ। येलि गुलाम रसूलन पृछुस, तँम्य वोन हॉरान गँछिथ, "त्वहि बूज़वु ना सुह संज़ ग़ज़?" मे तु परवेज़न हिलोव नकारस मंज़ कलु, मगर

जलाल दीनन कोर तस तॉयीद। दोपुन, “बा ख्वदा बूज मे पानु सुह संजुं ग़ज़। मगर मे वॉर अवु म्वखु छ्वपु जि त्वहि मा गछिवु फ़ठ।”

जलाल दीनन्य यि कथ बूज़िथ द्राव असि न्यसुब जुव। अम्युक मतलब गव जि सुह ओस वारु कारु व्वन्य असि ख्यनस ज़ागान। जय कौलन ओस व्वन्य सिग्रेट पथर थोवमुत। शायद ओस तस एहसास गोमुत जि सिग्रेट छु ज़ालनय।

मे ह्योत तथ गरि डाख करुन यथ गरि बु जलाल दीनन्यन कथन मंज़ यिथ तस सुत्य ऐडवेंचर करनि द्रास। मे हेच अँदरी पनुनिस मॉलिस माजि मॉफी जि मे ह्योक नु तुहँदि खॉतरु किहिन्य वॉरिथ तु वुह वुहरि पानय लोगुस सुहस छेपि। मे ह्योतुन अँछव मंज़ ओश वसुन। अकि अकि पेयम पनुन्य सॉरी अंग ऑशुनाव तु यार दोस याद।

वुछान वुछान ह्योत मे टुंगि वदुन तु मे वुछिथ आव मे सुत्य सुत्य बाक्यन ति वदुन। व्वन्य ओस यि ऑखुरी वख तु असि थँव सारिवुय अख अँकिस चिरु थफ वॉरिथ। मे ह्योत मनु मँज़ी यँद्रॉखी पाठ परुन। बाक्य सॉरी ति ऑस्य अँद्री क्याहताम परान।

ऑस्य ऑस्य कुल ऑठ नफर टीमस मंज़। शे ऐडवेंचर करन वॉल्य याने ग्वलाम रसूल, परवेज़, जय कौल, राज नाथ, जलाल दीन तु बु, बेयि जु कुली हनीफ खान तु कसाना। दरअस्ल गँछ्य ऑस्य कुल काह नफर आसुन्य मगर म्यॉन्य बेयि त्रे यार यिम हर हमेशु मे सुती ऑस्य आसान, आयि नु येमि लटि मे सुत्य कैह। वननु पॉठ्य वोन तिमव जि ऑस्य छि आवुर्य मगर मे ओस पूर येकीन जि तिम खूच्य जंगुलस कुन नेरुनस। म्यॉनिस मिनतु करुनस ति आव नु हॉसिल कैह। तिमव कोर मे सुत्य यिनस साफ इनकार।

वति पकान पकान तु बालु डकरि खसान खसान आव असि पोग। अँकिस दु-वँतिस प्यठ वॉतिथ गँयि कसाना तु हनीफ खान असि निशि छ्यनु। ऑस्य द्रायि अकि वति तु तिम द्रायि रछाह च़ीर्य वॉतिथ बेयि वति। यि कथ लँज नु असि जलदुय पताह कैह। ऑस्य येलि दुपहरस बाँग्य अँकिस ल्वकटिस मरगस प्यठ वॉत्य, त्रेश च्यनु बापथ दिच असि सामानस छाँड। मगर अफसूस! त्रेश तु दूद ओस तथ सामानस सुत्य रूदमुत युस कसानाहस तु हनीफ खानस अथि ओस। ऑस्य रूद्य प्रारान मगर तिम आयि नु कैह। गंटु जोराह प्रॉरिथ द्युत गुलाम रसूलन होकुम, ब्रॉठ पकनुक।

असि ओस नु नर्यन ज़ंगन जुवाह ज्यताह कैह, मगर टीम लीडरु सुंद होकुम मा बनिहे टालुन? यिथु तिथु वॉत्य ऑस्य पांछ बजे बाँग्य बजि मरगि प्यठ तु द्युत अति डेरु। त्रेश लगनु किन्य ऑस सारिन्युय हालत खराब। ब्यहान ब्यहानुय आयि ऑस्य पथर लायिनु।

रछाह गँछिथ पेयि कसाना तु हनीफ खान ति वॉतिथ। तिहंज़ हालत ऑस सानि खोतु ति खराब। तिमव बिचार्यव ऑस नु त्रेश सुत्य ऑसिथ ति वति त्रेश चेमुच। हनीफ खानन वोन जि तिम ऑस्य वथ रॉविथ परेशान हाल तु सिरिफ असि छांडनुच कूशिश करान।

त्रेश चथ तु रछाह आराम वॉरिथ लँग्य ऑस्य बैयि ड्वचुर ड्वचुर दिनि। बुथि ओस अँकिस जायि अख नाग। अँती त्रोव असि डेरु तु लोग खुमु गंडुन।

खुमु गँडिथुय बाँगरॉव गुलाम रसूलन बाक्य कॉम। जलाल दीनस तु राज नाथस आव बतु स्युन रनुनुक चार्ज दिनु। परवेज़न तु जय कौलन हेच खुमन अँद्य अँद्य नॉल्य बनावनुच मटिदॉरी। हनीफ खानन तु कसानाहन ह्योत नागु प्यठ पोन्थ सारुन।

मे ह्योत कैप फायर लागनु खॉतरु होख होख ज्युन छांडुन। गुलाम रसूल द्राव पानु अँद्य पँख्य अलाकच साम हेनि। गरज़ प्रथ कांह नफर गव, पनुनिस पनुनिस कारस सुत्य आवुर।

जंगलस मंज़ छे सुली राथ प्यवान। बतु ख्यनु ब्रॉठ लॅग्य अँस्य पानुवँन्य कथाह बाथाह करनि। हनीफ खान ओस पनुनि बहोदरी हुंज़ु दॅलीलु बोज़ुनावान। बंदूक तु बंदूकच लासन आसन म्वखु ओस सु विज़ि विज़ि हाइकिंग पारटियन सुत्य गछान युथ ज़न तिमन वख्ते ज़रुरथ जंगली जानवरव निशि बचॉविथ हैकि। अमि सुत्य ऑस तस जान कमाँय हालांकि तसुंदि वननु मुताँबिक ओस नु तस वुनिस ताम काँसि जंगली जानवरस सुत्य रू-बरू मुकाबलु सपुदमुत। हनीफ खान ओस सेहतु जान मगर शक्ति रोबदार। बासान ओस जि तसुंद रोबदार बुथ वुछिथुय आसुहन सुह तु हापत पथ ह्यवान।

तकरीबन नव बजे राथ ह्योत असि कैम्प फायर करनु बापथ ज्युन आयि आयि लागुन। फॉसलु गव जि कैम्प फायरस ब्रॉठ कनि ख्यमव बतु। वुनि ओस असि अथ चुख दिनय जि ग्वलाम रसूलस गँयि कनन क्याहताम आवाज़। दोपुन कुस ताम छु बासान दूरि पकान।

असि दिच प्रथ तरफु नज़र। अनि गट आसन म्वखु आव नु कैह लबनु। पतु द्युत कन। मे बास्यव नु कैह मगर जलाल दीनस बास्यव साफ। दोपुन हँकीकतन छे क्वसु ताम बलायि नागस कुन यिवान। यि बूजिथ कोर गुलाम रसूलन असि बँडिस खुमस अंदर अचनुक इशारु।

अँस्य चायि खुमस अंदर, तु बीठच सॉरी अख ऑकिस सुत्य। तीतिस कालस हेच गुलाम रसूलन वारु पाँठच हालातन साम। तसुंदि यि वननु पतु जि पँज्य पाँठच छे कमि ताम बलायि हुंदि पकनुच आवाज़ गछान, फँट असि तुर। यि कथ गँयि पतु सरु जि बुथि यिनु वाजेन्य बलाय ओस सुह।

यँदुँखी पाठ परान परानुय बूज मे गुलाम रसूलन्य कथ। सु ओस ल्वति ल्वती हनीफ खानस बंदूक कडनु खॉतरु वनान। हनीफ खानस प्यव व्वन्य याद जि तस ओस बंदूक ति सुत्य। तँम्य कँड पनुनि जोलनु मंज़ दु-नॅल्य। परवेज़न त्रॉव तस जाय तु सु आव ब्रॉह कुन।

जाय संबॉलिथ लोग हनीफ खानन दु-नलि सुत्य निशानु गंडुन। हनीफ खान ओस तैयार गूल्य चलावनु खॉतरु जि जलाल दीनन दिच क्रख। दोपुनस, खबरदार छुय, युथ नु गूल्य चलावख। असि दोप यि गव सुह वुछिथुय पागल। मे ह्योत तस ड्यकस अथु लॉगिथ तफ वुछुन।

तँम्य द्युत मे दकु तु वोननु, “म्यॉन्य मॉल्य छु वोनमुत, हरगाह सुह गूल्य लॅगिथ ज़ख्मी गछि तु मरि नु कैह, तेलि छु सु ज़बरदस्त खतरनाक सपदान, तु युस बुथि पेयस तस छु ख्यवान।” असि सूच यि आसि पोज़ुय वनान। मगर हनीफ खान ओस नु यि बोज़नु खॉतरु तैयार कैह। तँम्य दोप, मे छि सॉरुय खबर तु अथ मामलस मंज़ छे नु मे काँसि निशि ति कैह हेछिनुच ज़रुरथ। दर अस्ल मॉहिर शिकॉर्य। मे दोप यि अगर नु असि सुत्य आसिहे, असि क्याह बनिहे।

अँदरु ऑस हमलु दमल चलान जि सुहस छा गूल्य लायिन्य किनु नु, नेबरुय ओस सुह बे-वायि असि कुन वुछान। जलाल दीनन कँर बंदूकस थफ युथ नु हनीफ खान गूल्य चलावि। गुलाम रसूल चाव मंज़। तँम्य ह्योत जलाल दीन समजावुन, मगर सु ओस नु बोज़नुस तयारुय। यीतिस कालस पैयि जय कौलस, न्यबर कुन नज़र। दोपुन सुह छु वारु वारु असी कुन पकान। कसानाहन दिच वॉलिंज अथस मंज़ रँटिथ अख चूरु नज़र। तस चँज वदन बाख नीरिथ। दोपुन सुह छु बिलकुल खुमस नेबरु कनि बिहिथ। सारिनुय चँज खवरव तलु मेच नीरिथ। हनीफ खान व्वशल्यव ज़्यादय पहान। दोपुन व्वन्य छु नु गूल्य चलावनुक मोकय। गूल्य चलावन्य गव साफ सुहस हमलु करनुक दावथ द्युन।

मे गव व्वन्य यँद्राँखी परुन ति मँशियुय। अचानक गव जय कौल थोद वँथिथ। दोपुन, “हयो, मे छुमवु अँकिस फिल्मि मंज़ युथुय सीन वुछमुत। सुह ओस ब्रॉट कनि ऑस वाहराँविथ। हीरोयिन ऑस फ्रुट सुत्य मूमच। स्व ऑस सुहस निशि मसाह शे फुट दूर। हीरो ओस दूरि वुछान मगर सुहस ब्रॉट कुन यिनस ओस नु बँहरान।

सुह ओस अख नज़र हीरोहस कुन दिवान, तु ब्याख नज़र हीरोयिनि कुन। तमि पतु पोक सु ज़ु कदम बेयि हीरोयिनि कुन। व्वन्य ओस सु तैयार तस प्यठ जेफ्य मारुनस ज़ि हीरोहस प्यव ज़्वन। तँम्य वुछ ब्रॉट कनि अख गासु लोव। वुछान वुछान तुल तँम्य सु गासु लोव तु द्युतुन लाइटर सुत्य तथ च़ुख। गासु लॉविस लोग नार।

हीरो हन तुज कुनी दव तु आव दज़वुन गासु लोव ह्यथ सुहस कुन। युथुय सुहस तस प्यठ नज़र पेयि तँम्य त्रॉव हीरोयिन अँती तु च़ोल कुनी दव तुलिथ।” जलाल दीनन वोनस, “चोन मतलब छा अँस्य ति ज़ालव गासु। गासु कति छु?” जय कौलन वोनस, “लँश छना?”

यि वँनिथ तुज जय कौलन अख लशि हँट अथस मंज़ तु न्यून तथ च़ुख दिथ। पतु ज़ॉजिन ब्याख हँट तु रचन द्वशय लशि अथन मंज़। अमि पतु तुजि बाक़ुयव ति लशि तु द्युतुख तिमन च़ुख। गुलाम रसूलन तुल खुमस पर्दु थोद तु सॉरी द्रायि दज़वुनि लशि नच़ुनावान नच़ुनावान न्यबर। गुलाम रसूल ब्रॉट ब्रॉट तु बाक़ुय पतु पतु।

खोच़ु बुड आसनु किन्य रूदुस बु पथुय। मगर मे प्यव यकदम ज़्वन, ज़ि यिम सॉरी द्रायि लशि ह्यथ न्यबर, सुह यीतन यपॉर्य तु नीतन मे ख्यथ। बु दव्योस तिमन पतु पतु। तमि पतु यि सपद्यव ति मतु पृछ्यतव।

अँस्य फीर्य लशि ह्यथ सारिनय खुमन अँद्य अँद्य। तमि पतु गँयि नागस ताम। न ओस कुनि सुह तु न तसुंद कांह निशानु। असि दिच़ अनि गटि मंज़ुय सॉरिसुय अलाकस छाँड। कुनि गव नु कांह नज़रि। ग्वलाम रसूलन त्रोव असुन। अमि पतु आव नु कैह समुज, कँम्य त्रोव ग्वडु असुन तु वँम्य त्रोव पतु असुन।

दर अस्ल ऑस ज़ून गाशस मंज़ अकि दिवदारुचि बजि लंजि हुंज़ छा़य नागस प्यठ प्यवान। यि लँड हिलनु सुत्य ओस असि बासान ज़ि सुह छु गरा असि कुन वुछान तु गरा त्रेश च्यवान। जंगुलस मंज़ थद्यव थद्यव दिवदारव किन्य ओस नु पूर ज़ून गाश ज़ंमीनि प्यठ वातान तु अमि किन्य ओस नु असि साफ साफ कैह यिवान बोज़नु। मगर च़कि नु किहिन्य। वापस यिथ द्युत असि ज़िनिस नार।

कैप फायर ओस तैयस प्यठ दज़ान। ट्राई पाडस प्यठ ऑस्य सोबूथ क्वकर बुज़नु बापथ अलूंद। जलाल दीन तु जय कौल ऑस्य ख्यनु चनुक सामानु सजॉविथ लागान। गुलाम रसूलस प्यव ह्यस। यिनु कांह हंगु मंगु बंदूकस थफ दियि तु गूल्य गछि नीरिथ! तँम्य कोर हनीफ खानस आलव तु दोपुनस बंदूक अन। हनीफ खानन ओन बंदूक तु द्युतुन गुलाम रसूलस अथि। तँम्य मुच़ुरोव गोलि वापस कडनु खॉतरु बंदूकुक मैग्ज़ीन। वुछान वुछान गव गुलाम रसूलस बुथ्युक रंग पँक्य। हनीफ खान ओस कटु चेशमव तस कुन वुछान।

हनीफ खान ओस दु-नलि मंज़ गोलि त्रावनु वरॉयी सुह शिकार करनि ब्यूठमुत। अदु ख्वसु रुसवॉयी अमि पतु तस गँयि, स्व मतु गँछ्यतन काँसि।



नबु लालु

मामलु ज़ेठ्यव हना ज़्यादय पहन। नबु लालन ओस नु सूचमुतुय जि कथ वाति ओर प्यठ। यि ऑस अज़ ग्वडनिच विज़ येलि तस काँसि ठेकुरस सुत्य तकरार गव तु मामलु गव हदु न्यबर नीरिथ। ह्यड कलर्क सप्रू साँबन करेयि स्यठाह कूशिश जि बाँय बँदी सुती गोछ मामलु अंदुन मगर नबु लालु आव वुठनु। दफ्तरुक दफ्तर ओस हाँरान। नबु लालुन यि रुफ ओस तिमव ग्वडनिचि लटि वुछमुत।

कथ ऑस नु चकि किहिन्य। अकरम खानस ओस ड्राईवरन क्लीनरन हुंदि खॉतरु वरदीयि सपलाई करनुक ठेकु म्यूलमुत। तसुंद वनुन ओस जि तसुंज सारिवुय खोतु कम रेट आसनु किन्य म्यूल तस यि ठेकु। डार साँब, युस बँडिस साहबस पी.ए. ओस, ओस अथ कथि ताँयीदस मगर नबु लालस ओस नु यि व्यचान कैह। नबु लालुसुय योत क्याह, ल्वकटिस काँसि ति मुलॉज़िमस ऑस नु यि कथ श्रपान। हालांकि यि कथ ऑस टाकारु जि बोड साहब, येम्य सपलाई आर्डर कोडमुत ओस, ओस नु रशवु रटान। सु ओस पानु दूद सुत्य छलिथ। मगर बँनिम्यव ल्वकट्यव अफसरव ओस ब्वनय यि कार तँरीकु सान अंजाम द्युतमुत। अकरम खानन अँन्य पानय चोर टेंडर तु कॅरिन डार साँबस हवालु। पतु कोर सारिवुय ल्वकट्यव बड्यव ह्यमतो समतो तु बनोवुख तसुंदि नावु आर्डर। बोड साहब ओस पूर मामलु निशि बे-खबर।

बोड साहाब ओस नु वैसे ति यिमन ल्वकट्यन ल्वकट्यन मामलन सनान। तस ऑस खबर जि चपरॉस्य सुंदि प्यठ पी.ए. हस ताम छि साँरी मुलॉज़िम त्रेशाह तमोकाह रटान तु अमि वरॉय छुनु तिमन बतय श्रपान। मगर सु ओस नु यिमन कथन ज़्यादु सनान कैह। सु ओस तेलि मामलस सनान येलि लछु बद्यन हुंज काँम आसिहे। सासु वादन ओस नु सु पृछु गॉरुय करान। दपान तँम्य ओस अकि लटि डार साँबस ननि वानु वोनमुत जि ल्वकटिस मुलॉज़िमस नय बिचारस यिम नाँयिद पाँसु ति बनन, गुज़ारु कति गछ्यस? डार साँबन ऑस यि कथ लुकन कम तु पानस ज़्यादु पहन वँन्यमुच। मगर दफ्तरन मंजु छा कांह कथ चूरि रोज़ान? वारु वारु लँज यि कथ सारिनय पताह।

अज़ सुबहस येलि अकरम खान आर्डर निनु खॉतरु आव, सु वोत स्योदुय सप्रू साँबस निशि। ओरुच योरुच कथाह बाथाह कॅरिथ कोर सप्रू साँबन डार साँबस आलव। पतु द्रायि त्रेश्वय दफ्तरु न्यबर, शायद चाय चेनि। कैह काल गॅछिथ येलि तिम वापस आयि, अकरम खान वोत स्योदुय नबु लालस निश तु मॉगुनस आर्डर। नबु लालु ओस टाइपिस्ट-कम-डिसपैच कलर्क। तँम्य कॅरुस बुथिस कुन वारु नज़राह। फाइलि मंजु कोडुन आर्डर तु रोडुन अथस क्यथ। पतु दोपुनस, “अन हज़ साँन्य चाय।” अकरम खान ओस प्रोन खिलॉड्य। तस ऑस वुम्बुर गॉमुच मुलॉज़िमन सुत्य लेन देन करान, अमि किन्य ओस नु कुहन्य मुलॉज़िम तस मंगु मंग करान। अदु सुलि या चौर्य, सु ओस सारिनय हुंद माल तिमन बराबर वातुनावान। मगर नबु लालु ओस नोवुय नोवुय ओर आमुत, अमि किन्य ज़ानिहे नु सु अकरम खानस वारु पाँठ्य कैह। अकरम खानन कोड चंदु मंजु दँह वपुयुन अख तु थोवुन नबु लालस अथस क्यथ। नबु लालन त्रोवुस दँह वपुयुन वापस चंदस मंजु तु दोपुनस, “असि सुत्य नु हज़ मज़ाख कैह। शेठन सासन हज़ छुय आर्डर। बा ख्वदा रटय नु पुंचुहव कम डबल पाँसु।”

नबु लालु ओस वाँसि ल्वकटुय। योहय वुह अकवुह ह्यु आसिहे। ज़ु डाय वॅरी आसुहनस गॉमुत्य नोकरी करान मगर अथ दफ्तरस मंजु आमति स ऑसिस त्रे र्यथ गॉमुत्य। गॅर्य किन्य ओस जान। मोल

ओसुस नाँयिब तँहसीलदार तु पेठ्य वॉन्य ओस सु रुदुक्य पॉठ्य कमावान। अवु किन्य ऑस नबु लालस ति पनुन्य जान खर्चहन। पान सिग्रेट गँयोव ऑसिथुय, जु कदम ति हरगाह कडुन्य आसुहँनस, टांगु ओस छांडान। दफ्तर वॉल्य ऑसिस अवु किन्य लालु वनान, नबु लालु! यजतु खॉतरु कम तु हजुलन ज़्यादु।

पुंचुहन र्वपुयन हुंद नाव बूजिथुय खँच अकरम खानस ग्रख। दोपुनस, “हा यारु, चु मा छुख बावरु गोमुत। मे ना पुंचुह र्वपुयि ज़ांह पी.ए.सॉबस दिचुमचु, चु कमि वारि हुंद हाख छुख?” नबु लालस खोत वारि हुंद हाख बूजिथु खश्मु। दोपुनस, “गछ हज पगाह यिजि, पगाह दिमय आर्डर। मे छुय वुनि यि डिस्पैच करनय।” यि वॅनिथ थोव नबु लालन आर्डर बेयि मेजुकिस दराजस अंदर।

कथ वॉच सप्रू सॉबस ताम। तँम्य न्युव नबु लालु बुलॉविथ तु वोनुनस, “गोबुराह! वुनि छुख चु ल्वकुट। यि लगि नु करुन। खान सॉबस छुय ह्योर ताम रसूख। अँमिस सुत्य लगि नु रावुरावुन।” यि वॅनिथ कोड सप्रू सॉबन अकरम खानस आलव, “वलु हज खान सॉब यूर्य। दिस हज पंदाह र्वपुयि। बचु हय छु, मारोन मा!”

अकरम खान द्राव बुर्दबार। दोपुनस, “सप्रू सॉब! बु माहरा दिमुहँस नु दहि अलावु कैह। व्वन्य छुख चु वनान तु ठीख छु। बु मा छुस ज़ांह चॉन्य कथ टालान।” यि वॅनिथ कजि अकरम खानन चंद मंजु पंदाह र्वपुयि तु दिचन नबु लालस।

नबु लालस आव गुर ज़्यादय पहन। तँम्य सूच जि डार सॉबन तु सप्रू सॉबन आसि जान माल रोटमुत, मे छि टरकावान पंदहन प्यठ। दोपुनस, “पुंचुह माहरा छस नु ज़्यादु कैह। अँमिस क्या, कमावुन छुस ना?” अकरम खानस गव यि वनुन सख बरतबाह। दोपुनस, “चे मा छी मगुज खराब गॉमुत्य। बु हा करय यारु अकी टासु सुत्य कुलचु।” नबु लालस चायि मॉल्य संजु नाँयिब तँहसीलदॉरी मगुजन। दोपुनस, “गछ हज कर क्याह छुय करुन। गछ साहबस निश कर रपोर्ट।” नबु लालस ऑस पताह जि यिथिस मामुलस मंजु गछि नु कांह बँडिस साहबस निश। तस हरगाह रछाह ति शख गछ्यख जि यि ओस चूर टेंडर, सु कर्यख आर्डरुय कैन्सल।

अकरम खानस बास्यव जि नबु लालु छु ज़्यादय पहन नचान। शायद अमी किन्य जि मोल छुस नायिब तँहसीलदार। मगर बु ति गोस नु ल्वकचि माजि हुंद कैह। दोपुनस, “बा ख्वदा दिमय नु व्वन्य डबल पाँसु। वन आर्डर म्योन छुयि द्युन किनु नु?” नबु लालन कोरुस साफ इनकार।

वुछान वुछान गव मामलु सँगीन। अमि ब्रॉठ जि सप्रू सॉबस तरिहे कैह फिकरी, अकरम खान गव याशाह कॅरिथ थोद वॅथिथ तु चाव बँडिस साहबस निश। तति क्या सपद्यव, ति लॅज नु काँसि पताह। बँड्य साहबन करनुव चपरॉसिस अथि दरवाजु बंद।

रछाह गॅछिथ द्राव अकरम खान कमरु मंजु न्यबर। काँसि सुत्य वॅरुन नु कांह कथ तु द्राव गरु कुन।

यीतिस कालस वॉच डार सॉबस ति शेछ। सु आव दवान दावन सप्रू सॉबस निश। सप्रू सॉबन वॅन्य तस पूर दॅलील तफसीलु सान। डार सॉबन वोनुस, “मामलु छा यूत बिगर्योमुत? मे गॅछ ना शेछ करुन्य, बु समजावुहन नबु लालु पानय।” सप्रू सॉबन द्युतुस जवाब, “मे हज करेयि पानु स्यठाह कूशिश जि कथ गॅछ नु ज़ेटुन्य, मगर नबु लालु आव वुठनु। किहिन्य बूजुन नु योरुक।”

डार साँब तु सप्रू साँब गँयि स्यठाह दिल मलूल। युथ कुसु ओस अज़ ग्वडनिचि लटि सपद्योमुत। बँडिस साहबस कुन वुछिथुय आँस प्रथ काँसि तुर फटान, पतु बँहर्या कांह तस निश रशवु पाँसन हुंज़ कथ करुनस। यीतिस कालस सूज़ बँड्य साहबन डार साँबस नाद। डार साँबस व्वज़ुल्यव बुथ। नबु लालस कुन वुछिथ वोनुन तस, “छुनिथु साँ त्रठ, पानस ति तु असि ति! खबर क्या आस्यम व्वन्य बोज़ुन।”

दर अस्ल आँस बँडिस साहबस कोत ताम गछनुच जलदी। तँम्य ओस अकरम खानस ति पगाह सुबुहस यिनु खॉतरु वोनुमुत। डार साँबस वोनुन, “वुछ हज़ पनुन्य एडमिनिसट्रेशन। क्याह वनु बु पगाह अँमिस ठेक़दरस? अँमिस लडुकस गछि वनुन सुबुहस हॉज़िर रोज़ुन।” यि वँनिथ द्राव बोड साहाब।

राँत्य रातस ओस नबु लालु तारख गँज़ुरावान। स्व कति नैदर? मॉलिस ति ह्योकुन नु कैह वँनिथ। यिनु वोल सीन याद वँरिथुय फँट तस तुर। तँम्य ओस नु यि खाबस मंज़ ति सूंचमुत ज़ि अकरम खान अचि पँज्य पाँठ्य बँडिस साहबस निश।

सुबुहस बुलॉव्य बँड्य साहबन अकरम खान तु नबु लाल यिकुवटय। डार साँब ति ओस हॉज़िर। बँड्य साहबन करुनोव दरवाज़ु अँदुर्य किन्य बंदु। नेबरु कनि आँस्य दफतरुक्य बाक़ुय मुलॉज़िम कन दिथ बोज़नुच कूशिश करान। सप्रू साँब ओस पनुनिस मेज़स प्यठ बिहिथ दयान।

नबु लालु ओस अँकिस कूनस मंज़ व्वदनी, बुथि लेदुर्योमुत। अकरम खान ओस कुरसी प्यठ बिहिथ। डार साँब ओस व्वदनी तु साहबन कोर तस बेहनुक इशारु। बँडिस साहबु सुंदिस वनुनस प्यठ बोज़ुनाँव अकरम खानन साँरुय दँलील। दोपुनस, मे हज़ दिचॉमस खुशी सान दँह र्वपयि, मगर यि वोथ नु पुंचुहन र्वपुयन डबल पाँसु। वन तु हज़ मे कुस लास छु त्यूत लबुन।

बँड्य साहबन बूज़ साँरुय दँलील वारु पाँठ्य। यीतिस कालस अकरम खान शेछ ओस वनान, तीतिस कालस वँर नबु लालन पानस मंज़ ह्यमथ पाँदु। सूंचुन, युथुय मे पृछि, बु ह्यमस नलम। दपस यि हज़ छु अपुज़ वनान। हरगाह डार साँब तसुंद तरफ करि, बु दपस डार साँब ति छु अपुज़ वनान। यिम हज़ छि दूश्वय रँलिथ।

मगर ति कुसु सपद्यव नु कैह। साहबन पृछुय नु नबु लालस कैह। बुथ गोस खतरनाक। ड्यकस खचस द्रुह। अँछव ज़न ओसुस नार नेरान। डार साँबस कुन वुछिथ वोनुन, “मे तार तु हज़ फिकरी, बड्यन बड्यन अफसरन निश गँछिथ छि यिम ठेक़दर वफूर पाँसु बाँगुरावान। जायि जायि छि डालि पकुनावान। व्वन्य हरगाह येम्य मांचुकुलन र्वपयि पुंचुह मंजिनस, तु द्रास जुव। त्वहि ति आस्यन खर्चुहन बराबर दिचमुच, तमि वराँय मा वँरिवुस तोह्य काँम। मगर ल्वकटिस मुलॉज़िमस बिचारस दियिहे नु कैह।” माहोल गव यकसर बदलिथ। डार साँब ओस साँचान, खबर क्वसु त्रठ छुनि यि नबु लालस, मगर अज़ ओस बँडिस साहबस नोवुय रुफ। डार साँबन थोव कलु ब्वन कुन। तस आव नु समजुय क्याह पज़ि करुन। अकरम खानन ह्योत बुथिस आँरख व्वथुरावुन। बँड्य साहबन वोनुस, “चे हज़ छुय अथ कामि मंज़ स्यठाह ज़ेनुन। पुंचुह र्वपयि क्वसु हज़ कथ गँयि? यिम कुसु ह्यथ नु हज़ गछि नु मे निश युन। हरगाह युन आसि, काँसि बँड्य सुंज़ शकायथ ह्यथ गछि युन। ति करख नु ज़ांह।”

अकरम खानस वोथ दिगनि आँरख। डार साँबस आयि नु चलनस वथ। दूश्वय द्रायि दुह्य लद गगर ही न्यबर। अकरम खान चोल स्योदुय गरु। सु रूद नु अँज्यकिस काँसि बुथ ह्युन लायखुय।

नबु लाल ओस अँदुर्य ख्वश। तस ओस्य ब्वकु फवलान। सु ओस व्वन्य कमुरस मंज कुनुय ज़ोन। बँड्य साहबन कोर चपरॉसिस आलव तु करुनोवुन दरवाज़ु बेयि बंद। चपरॉस्य द्राव न्यबर। नबु लालस आव नु कैह समुज। सु ओस व्वन्य बँडिस साहबस कटु चेश्मव वुछान। यीतिस कालस कँड बँड्य साहबन दराज़ु मंजु लूर तु वोथ कुरसी प्यठ थोद। वुछान वुछान त्रॉव्य तँम्य नबु लालस फीतिन्य कँरिथ। तस खचु लहा। बँड्य साहबन दोपुनस, “जुमाह जुमाह गँयी ऑठ दूह नोकरी करान, चु छुहमु वुन्यकि प्यठय डिमांडु करान। सु ति म्यॉनिस दफ्तरस मंज। अकरम खानस छा वर्दीयि सपलाई करनि किनु चोन चंदु बरुन।” यि वँनिथ कँड बँड्य साहबस तस अख दुदुर चपाथ। नबु लालन ह्योत टूंगि वदुन। अमि पतु हेच तँम्य साहबस मॉफी। बाक्य मुलॉज़िम ओस्य दरवाज़ु चुरनि मँज्य सोरुय वुछान।

नबु लालु येलि पनुनिस मेज़स प्यठ वापस वोत, तस आसु अँछ व्वज़ुजि। बाक्य मुलॉज़िम आयि तस निश हमददी हावनु बापथ मगर तँम्य कँर नु तिमन सुत्य कथुय। बुथ थोवुन ब्वन कुन तु ड्यकस द्युतुन अथु। बाक्य मुलॉज़िम गँयि वापस पनुनि पनुनि जायि प्यठ।

गंटु जोराह गँछिथ आव अकरम खान वापस तु वोत स्योदुय नबु लालस निश। सप्रू सॉब आस सुत्य। नबु लालन तुल कलु थोद। खान सॉबन वोनस, “नबु लाल, मे हज़ दिज़ि मॉफी।” अमि पतु कजि खान सॉबन चंदु मंजु पुंचुह र्वपयि तु त्राव्यन नबु लालस ब्रॉठु कनि। नबु लालन त्रॉव सप्रू सॉबस कुन वारु नज़र। सप्रू सॉबन होवनस इशारु जि रठ, कैह छुनु परवाय। नबु लालन गँज़ुरावि र्वपयि तु कोरुन तिमन ताह। अकरम खानस कुन कँरुन नज़राह तु त्रोवुन हल्कु असुन। तमि पतु तुजन र्वपयि तु त्राव्यन खान सॉबस चंदस मंज वापस। दोपुनस, “व्वन्य हज़ ह्यमय बराबर पंचाह र्वपयि, अदु दिमय आर्डर।” अकरम खानस गव हेरिम शाह ह्योर कुन तु बँनिम शाह ब्वन कुन। सप्रू सॉब चोल वापस पनुनि जायि प्यठ। तस आव नु समजुय जि यि क्याह छु सपदान।

यि सूचिथ जि बँडिस साहबस निश बेयि गछनुक छुनु कांह फॉयुदय, अकरम खानन कजि चंदु मंजु पंचाह र्वपयि तु दिचनु नबु लालस। तँम्य पिलुनोवुस आर्डर। सप्रू सॉब ओस दूरि प्यठ वुछान। तस आव नु समजुय जि कँम्य कोर ठीख तु कँम्य कोर गलथ।

